

San Marcos

*Juan chë Ubayaná entsanga yojanabuayiyná
(Mt 3.1-12; Lc 3.1-9, 15-17; Jn 1.19-28)*

¹ Měntšá tojanobožatsé chë tšabe noticiēnga Běngbe Bětsabe Uaquiñá Jesucristbiama.

² Ntšamo bayté entsemna, chë Běngbe Bětsabe juabna oyebuambnayá Isaías chabe librěšaňe yojěftsayancá, ntšamo Běngbe Bětsá chabe Uaquiñábioye ibojauyanama cha tojanábema ora: Minýe, atšbe abuayiynayá acbe natsana sěntsichamná, chë aca jabama lempe echanjaprónta cha.

³ Entšanga ndoyena luaroca cha enduáyebuache měntšá:
“Běngbe Utabná echanjabo ca;
mo nda canýe benache tojtseprontacá canýe uámana entšá jashjanguama,
cachcá tšěngaftanga, cha jabama ainaniňe tšabe juabněngaca šmochtseprontana ca” –cha tojanábema.

⁴ Chcase, Běngbe Bětsá Juan tbojanichmó, y cha tojánbocna entsanga ndoyena luaroca, Běngbe Bětsabe soyěngama abuayiynaye y entsanga ubáyana. Cha entsanga yojanětsětsnaye: “Tšěngaftangbe bacna soyěngama ngmėnaca šmochtenójuaboye, chca amana šochtsajbaná, y Běngbe Bětsabe benache šmochtishache. Chora cbochjúbaye, y Běngbe Bětsá tšěngaftangbe bacna soyěngama cmochanjáperdonaye ca.”

⁵ Njets Judea luarocana chábioye entšanga imojánbocana, y Jerusalenentsana njetsca entšángnaca, y Bëngbe Bëtsábioye chëngbe bacna soyëngama jaimpáda chentsana, Juan Jordán ca uabaina béjajiñe chënga yojanëbáyana.

⁶ Juanbe entšayá inauapormana camellbe stjënasheca y bobache yojanasnana; chapulinatémënga y tjañe méloye inasaye.

⁷ Y mëntšá entšanga yojanëtsëtsnaye: “Atšbe ústonoye inya echanjabo, atšbiamá más obenana bomná; chíyeca atše mercedo taitsatobuajoñe, ni mo jotsejbiyana chabe shecochëtjonëshentša corriëja jajafjonama.

⁸ Atšna býyesheca cbondëubáyana, pero chë echanjabábeyecna, Bëngbe Bëtsá bochanjíchmuá chë Uámana Espíritu tšëngaftangbe ainaniñe cháuamashënguama ca.”

Juan, Jesúsbioye tbojanabaye

(Mt 3.13-17; Lc 3.21-22)

⁹ Chë tempo, Galilea luarocana Nazaret pueblentsana Jesús yojëftsebocna, y Juan yojtsemnoye tojána; y Jordán béjajiñe Jesúsbioye cha tbojanabaye.

¹⁰ Bejayoicana yojtashëbëbocna orna, tojáninje celoca atëfjniñe, y chë Uámana Espíritu chábioye mo palomatemcá yojtsastjajuana.

¹¹ Y celocana Bëngbe Bëtsá mëntšá tbojanianyana: “Acna atšbe bonshana Uaquiñá condmëna; acbiamá corente sëntsoyejuá ca.”

Jesús tojanobená Satanás jayëñjanama

(Mt 4.1-11; Lc 4.1-13)

12 Chentsana chë Uámana Espíritu Jesúsbioye entsanga ndoyena luaroye tbojanánatse.

13 Canta bnétsana te chë entsanga ndoyena luaroca tbojanjétana, y Satanasna yojanabó jisháchichiyama. Chë luarentše tšátjaye bayënga imnajena; chentsana, Bëngbe Bëtsabe angelënga cha imojtseserverna.

Jesús tojanontsé Galileoca chabe trabajo jamana

(Mt 4.12-17; Lc 4.14-15)

14 Juan cárceloye tmojanëtámentšana, Jesús Galileoye tojesaná; y chiñe cha yojanabuayiyná chë tsabe noticiënga Bëngbe Bëtsabiana.

15 Jesús entsanga yojanëtsësnaye: “Ora tocjobuache, Bëngbe Bëtsabe amëndayana echanjóshjango. Tšëngaftangbe bacna soyëngama ngménaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tsabe noticiënga Bëngbe Bëtsabiana šmochjóyëngacñe ca.”

Jesús tojánachembo canta boyabásenga beonga ashebuánayënga cha chamuastama

(Mt 4.18-22; Lc 5.1-11)

16 Galilea uafjónaye tsachajana Jesús yojtsaye ora, cha tojánanyë Simón y chabe uabentsá Andrés; chatna atarraiešhangá ibnetsashbuëtsetšañe, er beonga ashebuánayata chata ibnamna.

17 Chora Jesús tojanéyana: “Atšeftaca mabata. Atše cbochanjábiana Bëngbe Bëtsabiana entsanga anguayata; y morscana, nye beonga ashebuánayata ndoñe quešochátsmëna ca.”

18 Y cachora chatbe atarraïëshangá cachcá tbojésanaboshjuana y Jesús tmojanasto.

19 Más chcoye yojátaye orna, Jesús tojánanÿe Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe, chatbe atarraïëshangá atapórmayíne.

20 Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúseftaca tbojtsanoñe.

Jesús, bacna bayëjbe juabna cánÿabioye tbojanbo-juaná

(Lc 4.31-37)

21 Chentšana, Jesús y chabe uatsjéndayënga Capernaum ca uabaina puebloca tmojánashjajna. Chë ochnayté, Jesús chë judiëngbe enefjuana yebnentşe tojánamashëngo y yojóntşa entsanga jabuátambama.

22 Entsanga imojtsenjnanaye ntšamo Jesús yojtsabuatambacá, er chama mo canÿe mando bomnacá yojtsóyebuambnaye, ndoñe nÿe ntšamo Moisesbe ley abuátambayënga imojanabuatambacá.

23 Chë pueblentşe judiëngbe enefjuana yebnentşe yojtsemna canÿe entsá bacna bayëja uambayá, y chábeyeca chë boyabása yojóntşa mëntšá uayebuáchana:

24 —¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atşe sëndétatšëmbo nda aca comnama, aca chë Bëngbe Bëtsabe Uamaná ca.

²⁵ Chora Jesús chë bayëjbioye tbojtsanácacana, y tbojaniyana: —¡lytëca móbema y chábentšana maisebocna ca!

²⁶ Chora chë bacna bayëjna tojanma chë boy-abása ataque chaboshachama, jabuache tojanoyó y chábentšana tojésanbocna.

²⁷ Chama, nÿetsca entsanga ojnánänënga imojtsemna, y mëntšá imojtsentjanaye: “¿Ndayá chca yojtsemna? ¿Canÿe tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjënga cha jtsamëndayana y chëngnaca joyeunayana ca!”

²⁸ Y betscó nÿets Galilea luarentša pueblënguenache Jesusbiamá yojtsótatšëmbo.

Jesús, Simón Pédrëbe uambén mamábioye tbojanashná

(Mt 8.14-15; Lc 4.38-39)

²⁹ Chentšana, chë enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye.

³⁰ Simonbe uambén mamá šocá inajájona, jabuache calentóraca, y Jesúsbioye chë šocabiamá tmojaniyana.

³¹ As chora, Jesús tojanobeconá, chë šocábioye tbojanábuacueshache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontšé chënga jobuácuedana.

Jesús ba šoquënga tojanashná

(Mt 8.16-17; Lc 4.40-41)

³² Chë te jetiñe, shinÿe ya yojuenatjëmba ora, chë luarentša nÿetsca šoquënga y bacna bayëjënga uambayënga Jesúsbioye tmojanënatse;

³³ y n̄yetsca ents̄anga b̄šoye imojobeconá.

³⁴ Jesús banga tojanashná, n̄yetsca šocana bomn̄enga, y ba bacna baȳj̄enga ents̄anguents̄ana tojt̄an̄ebuacna; y ndoñe tonjanalesenciá ch̄e baȳj̄enga chamóyebuambama, er ch̄enga imnatát̄š̄embo cha ch̄e Cristo b̄tsemnama.

Ch̄e judīengbe enefjuana yebn̄enguenache B̄ngbe B̄tsabe soȳngama Jesús yojanabuayin̄a

(Lc 4.42-44)

³⁵ Ȳfsana cabá cach̄ese, cabá ibetcá, Jesús toj̄éftsantsbaná, ch̄e pueblents̄ana toj̄éfts̄anbocna y ents̄anga ndoyena luaroye tojtsanoñe, choca B̄ngbe B̄tsáftaca jencuéntama.

³⁶ Pero Simón y chabe enut̄engna tmojána jetsenguanguama;

³⁷ y tmojtsanin̄yena ora tmojaniana: — N̄yetscanga cmontsenguá ca.

³⁸ Y Jesús tojan̄eyana: —In̄yoye cuajna, cam béconana puebl̄engoye, chíñnaca B̄ngbe B̄tsabe soȳngama ents̄anga chayábuayenama; er chama at̄še s̄enjabo ca.

³⁹ Y chent̄sana, Jesús yojánana B̄ngbe B̄tsabiama ents̄anga abuayin̄yaye ch̄e judīengbe enefjuana yebn̄enguenache, n̄yets Galileiñe, y ents̄ángbents̄ana bacna baȳj̄enga yojt̄ebuacana.

Jesús, can̄ya bacna nguayanánaca šocábioye tbojanshná

(Mt 8.1-4; Lc 5.12-16)

⁴⁰ Chent̄sana, can̄ye boyabása bacna nguayanánaca šocá Jesúsbioye tojanobeconá; y josham̄ents̄ase m̄ents̄á tbojanimpadá: —Aca

tcojtsebošese, aca catjobenaye atšbe šocana jtsebojuánama ca.

⁴¹ Jesús chabiamá tbojanongmé; cucuátšeca tbojánbojajo y tbojaniyana: —Aíñe sěntseboše. ¡šocana cbotsebojuaná ca!

⁴² Y cachora chě šocana tbojtsanóbojuanañe y tšabá yojtsatsměna.

⁴³ Chora Jesús chábioye tbojtanichmó, pero puerte měntšá tbojanmandá:

⁴⁴ —Mouena; ndocnábeñe quem soye cattsecuéntaye; nŷe Jerusalenoca báchněbioye motsa y cha cochjinŷinŷiye aca mora ya tšabá cojtsatsměnama. Chora cochjuátšěmbona ntšamo Moisés chabe leyiñe tojanmandacá, Běngbe Bětsábioye chama jětschuayama, chca, nŷetsca entšanga chamotatšěmbona mora ya tšabá cojtsatsměnama ca.

⁴⁵ Pero chě boyabásana, chentšana tojěftsanbocna y cachora yojóntša nŷetsquénache entšanga yapa acúntayana Jesús tbojanshnama. Chě causa, Jesús ndoñe yontsobena entšangbe delante pueblěnguenache jtsanana, ndayá nŷe chě pueblěnga béconana y nŷetsca chě entšanga ndoyena luarěnguiñe yojánana; pero nŷets luarěngocana chábioye entšanga imojánashjajuana.

2

*Jesús, canŷe jama ndobenábioye tbojanshná
(Mt 9.1-8; Lc 5.17-26)*

¹ Chentšana, Jesús Capernaumoye tojtanashjango; y entšanga imojátatšěmbona, Jesús yebnentše yojtsatsměnama.

² Mallajta entšanga chentše tmojanójoto; chë causa chë yebnentše ya tondaye más luare entšangbiana yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayiynaye.

³ Chora tojanopasá, canta boyabásenga tmojánashjango, canye entšá jama ndobená imojtsaismana.

⁴ Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanëstjango.

⁵ Jesús tojáninye chënga tša imojtsošbuaché chë šocá jáshnama cha yojanobenama; as chë jama ndobenábioye tbojaniana: “Sobreno, mouena; acbe bacna soyënga tcbontseboperdoná ca.”

⁶ Chentše báseftanga judiëngbe ley abuátambayënga imnatbemana; chënga chora mëntšá imojtsejuabnaye:

⁷ “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entšá quenátobena ínÿabioye bacna soyëngama japerdónana; nye Bëngbe Bëtsana aíñe ca.”

⁸ Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanëyana: “¿Ndáyeca chca tšëngaftanga ainaniñe šmojtsejuabná?”

⁹ ¿Tšëngaftangbiana ndayá más paselo nántsemna tšëngaftangbe delante chë jama ndobenábioye atše

jauyanana: ‘Acbe bacna soyënga tcbontsebop-erdoná’, o ‘Matëtsbaná, acbe tjuashe mesocñe y motsa ca’?

¹⁰ Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojaniana:

¹¹ “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

¹² Cachora chë jama ndobená tojtantsbaná, chabe tjuashe yojescñe, y entšangbiajana chentšana yojésebocna. Chama nÿetsca entšanga imojenjnaná y Bëngbe Bëtsábioye imojtsatschuanaye, y mëntšá imojtsichamo: “Nÿa ndocna te tša bëts soye chemuáisinÿe ca.”

*Jesús, Levíbioye tbojanchembo chabuastama
(Mt 9.9-13; Lc 5.27-32)*

¹³ Chentšana, Jesús cachiñe chë uafjajónaye tsa-choye tojesaná; ba entšanga chábioye imojobecóná, y Jesús yojtsabuátambaye.

¹⁴ Chentšana yojtsataye orna, Jesús tbojáninÿe Levíbioye, Alfeobe uaquiñá, yojtsanotbemañe, entšanga impuesto atjanayacá inétsotrabaña. Chora Jesús tbojaniana: “Smasto ca.”

Y Leví tojantsbaná y tbojanasto.

¹⁵ Tojanopasá, Jesús Levibe yebnentše yojtsesaye, y banga Romocama entšanga impuesto atjanayënga y inÿe bacna entšanga, mesëshentše cánÿiñe imojtsetbiámana, Jesús y chabe uatsjëndayëngaftaca; er ba entšanga cha imojústona.

16 Chë fariseunga y chë ley abuátambayënga, chë entsángaftaca Jesús vojtsesama tmojáninÿe ora, chabe uatsjéndayëngbioye tmojanatjá: —¿Ndáyeca tšëngaftangbe buatëmbayá, entsanga impuesto at-janayëngaftaca y bacna soye amëngaftaca vojtsesá ca?

17 Jesús chca tojanuena; as mëntsá tojanëjua: —Chë salud tmotsobomñënga, ashnayá ndoñe ntsëjabótana, pero chë šoquëngna aíñe. Y atše ndoñe chiyátabo chë Bëngbe Bëtsabe bominÿiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama

(Mt 9.14-17; Lc 5.33-39)

18 Canÿe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entsanga Jesúsbioye tmojanobeconá y mëntsá tmojanianya: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

19 As Jesús tojanëjua: —Chë casamento fiestentše, chë ófjanënga saná ndoñe ntsabuáshebenana. ¿Ntsamo chca ndoñe nántsemna? Chë tojobouamá entsá chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana.

20 Pero ora echanjobuache y chë boyabása chëngbentsana mochantsánatseñe; chora cocayé

chë ófjanënga echántsamna tondaye ntjascá jtsemnana. Ntšamo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjendayëngaftacnaca.

21 “Ndocná, canÿe tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabéconana y chë tanguá entšayá más jt-satanëcanana, y chca, chë uátanëcniñe más bëtsiñe jtsabemana.

22 Y cach ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

Jesusbe uatsjëndayënga canÿe ochnayté trigo tmojanátabebe

(Mt 12.1-8; Lc 6.1-5)

23 Canÿe ochnayté, Jesús canÿe jajajana yojtsaye; y chabe uatsjëndayënga chëjana imojtsachnëjuana ora, tmojanontšé trigo juatabebiana.

24 Chë fariseunga chca imojinÿe ora, Jesúsbioye tmojanianyana: —Minÿe. ¿Ntšamo acbe uatsjëndayënga montsamcá, ndoñe quenátslesenciana ochnayté jtsamama ca?

25 Pero cha tojanëjua: —¿Ndoñe šmëndualía y šmondëtatšëmbo ntšamo Rey David y chabe enutënga tmojanmama shëntseca imojtsemna ora y jasama yojtsëjaboto ora?

²⁶ Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentşe Bëngbe Bëtsá yojamna inÿinÿnaye tandëšënga yojase; y chë cháftaca imojánajna entšágnaca yojátšataye. Y chë tandëšna nÿe bachnangbiama belesenciana jasama. Masque David chca tojanma, Bëngbe Bëtsá ndoñe tonjánayana David canÿe bacna soye tojanma ca.

²⁷ Y Jesús más tojánayana: —Bëngbe Bëtsá ochnayté entšabiama tojama y entšá ndoñe tbonjánbema nÿe chë ochnayté ndoñe chaondëtrabajama.

²⁸ Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

3

Chë buashana cucuatşe bomna entšá (Mt 12.9-14; Lc 6.6-11)

¹ Chentšana, Jesús cachiñe chë judiëngbe enefjuana yebnoye tojésanamashëngo; y chentşe canÿe boyabása yojtsemna, buashana cucuatşe bomná.

² Chë fariseunga chiñe imojtserrondana jinÿama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana.

³ Chora Jesús chë buashana cucuatşe bomnábioye tbojaniyana: —Chentşe, entšangbe delante motsa ca.

⁴ Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

Pero chënga ndocá tmonjanjuá, nÿe iytëca imojbiamá.

⁵ Chora Jesús rábiaca y ngménaca chë fariseunga tojanëñyanÿé, chënga ainaniñe josértama ndoñe montseboše causa; y chë buashana cucuatše bomnábioye tbojaniyana: –Macuenÿanëjaná ca.

As chë boyabása tojanacuenÿanëjaná, y chora tšabá chëtša yojsatamna cach inÿetsacá.

⁶ Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontšé juabnayana ntšamo jamëse Jesús jóbama.

Mallajta entsanga Jesúsbioye tmojanobeconá

⁷ Chentšana, Jesús chabe uatsjéndayëngaftaca tojanoluaré mar bėjaye tsachoye, y Galileocana bëtscá entsanga tmojanasto.

⁸ Inÿe entšágnaca chábioye tmojanobeconá Judeocana, Jerusalenocana, Idumea ca uabaina luarocana, Jordán bėjaye chenguanoicana, Tiro y Sidón pueblëngocana. Chënga tmojanobeconá, Jesús tša bëtš soyënga yojsamama tmojanuena ora.

⁹ Jesús chabe uatsjéndayënga tojanëyana: “Motsajna y canÿe barquësha atšbiamá šmochjuapróna, tša entsanga ndoñe chašmondëtsatsëntšnama ca.”

¹⁰ Er cha banga tojanashná, y chë causa, nÿetscanga šocana bomnënga chábioye tmojanujuatsëntšená cha jabojuama.

¹¹ Y chë bacna bayëjënga uambayëngna, Jesús tmojinÿe ora, betsco chabe shecuatšentše imojtsofshëntsaméntšenaye, y chë bacna

bayëjngbeyeca mëntsá imojtsáyebuache: “¡Aca Bëngbe Bëtsabe Uaquiñá condmëna ca!”

¹² Pero Jesús puerte tojanamëndá, nda cha bëtsemnama entsangbe delante ndoñe chamondëtsichámuama.

Jesús chë bnëtsana uta uatsjédayënga tojanabacacá

(Mt 10.1-4; Lc 6.12-16)

¹³ Chentšana, Jesús canye batsjoye tojántsjua, y ndëmuanyënga tšabá tbojanínynanënga tojánachembo. Y chëngna chábioye tmojanobeconá.

¹⁴ Chora, chënguentšana bnëtsana útata tojanëbuáyana, chamotsetjëmbambnama, y Bëngbe Bëtsabe soyëngama entsanga chámabuayenama;

¹⁵ y chënga obenana tojanatsatá entsángbentšana bacna bayëjnga jtëbuacanama.

¹⁶ Mënga mondmëna chë bnëtsana uta bocacánënga: Simón, chë ndábioye Pedro ca Jesús tbojanabaye;

¹⁷ Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”;

¹⁸ Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá;

¹⁹ y Judas Iscariote, chë chentšana ndoñe baytesna, Jesús uayayëngbe cucuatšiñe bochjanboshjoná.

Ley abuátambayënga tmojánayana, Jesús Satanásbentšana obenana tojanóyëngacñe ca

(Mt 12.22-32; Lc 11.14-23; 12.10)

²⁰ Chentšana, Jesús yebnoye tojtanamáshëngo, y tša entšanga chentše tmojanójoto; chë causa, ni cha ni chabe uatsjëndayënga, ni mo jasama luare ndoñe imontsebomna.

²¹ Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entšanga imojtsencuéntaye cha opá tojtsanóbemaca.

²² Y chë ley abuátambayënga Jerusalenocana tmojánashjajnëngna Jesusbiana mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entšángbentšana bacna bayëjënga chauatëbuacnama ca.”

²³ Chënga chca imojtsichámuama, Jesús chënga tojánachembo, y cuentëngaca tojanontsé jáuyanana, jinÿanÿiyama chënga canÿe ndoñe ndegombre soyiñe imojtsemnama, mëntšá: “¿Ntšamo Satanás nantsobena cachá jtenábocnama ca?”

²⁴ Canÿe amëndayábentše entšanga tmojtsenojatá y tmojtseináyase, chë amëndayana ndoñe ntjatotonana.

²⁵ Cachcá, canÿe yebnentše pamíllanga tmojtsenojatá y tmojtseináyase, chë pamíllanga ndoñe tšabá nÿets tempo quemochátsmëna.

²⁶ Y cachcá, Satanás y chábenga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

²⁷ “Ndocná quenátobena canÿe corente añemo bomna entšabe yebnoye jamashënguana y

chabe soyënga jtsebocana, ndoñe natsana tconjshétsebatsëquëse. Nye tcojshétsebatsëquëse cocayé cuanjobenaye cha jefcana.

²⁸ “Ndegombre cbëyana, Bëngbe Bëtsá entsangbe nyetsca bacna soyënga echanjáperdonaye, y ntšamo Bëngbe Bëtsabiana y ínÿengbiana ndoñe tšabá tmonsichamo soyëngnaca;

²⁹ pero chë Uámana Espíritbiana ndoñe tšabá ichámëngna ndocna te queochátaperdonaye, er nyetsca tescama castigánënga jtsemnama chënga jtsamnana ca” —Jesús tojánayana.

³⁰ Jesús chca tojanëyana, er chënga imojtsichamo cha bacna bayëja ibojtsambá ca.

*Chë Jesusbe ndegombre pamíllanguentšënga
(Mt 12.46-50; Lc 8.19-21)*

³¹ Chëntscuana, Jesusbe mamá y catšátanga choye tmojánashjajna, pero nye shjoca imojtsemna; y canÿa tmojanichmó cha jachembuama.

³² Chë ba entsanga chentše chabe shëconana imojtsetbiámanëngna, chora tmojaniana: — Acbe mamá, acbe catšátanga y uabënanga shjoca montsemna; aca cmontsenguá ca.

³³ Chora cha tojanëjua: —¿Nda atšbe mamá yomna, y ndëmuanÿenga atšbe catšátanga ca?

³⁴ Chentšana, chë chabe shëconanana tbiamanëngbioye jarrepárase, tojánayana: — Quemënga mondmëna atšbe mamá y atšbe catšátanga.

³⁵ Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabena y

atsbe mamá, atsbe ndegombre pamillanguentšá ca.

4

Chë jenabe cuento

(Mt 13.1-9; Lc 8.4-8)

¹ Chentsana, uafjajónaye tsachoca Jesús tojtëtanontšé Bëngbe Bëtsabe soyëngama jabuátambama. Mallajta entšanga tmojanobeconá causa, chë uafjajónayentše yojanamna canye barquëshoye Jesús tojánasëngo y tojanótbema; y chë entšanga tsachoca imojtsemna.

² Chora cuentëngaca ba soyëngama tojanabuatambá.

Mëntšá tojanëyana:

³ “Smochjouena; canye jená chë jënaye jaujqüëshama yojëftsebocna.

⁴ Yojtsëjqüëshaye orna, básefta jënaye benache juachañe yojuatquëcjana; pero jaja shloftšënga imojástjajna y lempe imojtsósañe.

⁵ Inye meshëngna ndëtsbenguiñe yojuatquëcjana, ndoñe yapa fshantse binÿnentše. Chiñna betscó yojuábocna, ndoñe yapa jashenocana fshantse yojanmëna causa;

⁶ pero yojuábocna orna, puerte yojojënyána y yojtsancta; y yojtsábojo yapa tbëtëjënga tondaye causa.

⁷ Inye meshëngna uchmëshangañe yojuatquëcjana; chë uchmashá yojuájua ora, lempe yojtsatscué, y chca, chë jënayentšana tondaye yonjuashájona.

⁸ Pero inye meshëngna, uanguaniñe yojuatquëcjana, y bëts cá tšabe shajuanënga

chiñe yojóbocna: ínÿenache, canÿe meshentsana unga bnétsana meshënga yojóbocna; ínÿenachna, chnënguana bnétsana meshënga; y ínÿenachna patse meshënga ca” —cha tojánayana.

⁹ Y chentsana, Jesús más tojánayana: “Chë jouenama tmojtsoebenënga, šmochjouena ca.”

*Ndáyeca Jesús cuentëngaca yojánabuatambaye
(Mt 13.10-17; Lc 8.9-10)*

¹⁰ Chentsana, Jesús canÿa yojoquéda ora, chë chabe béconana imojtsemmënga chabe bnétsana uta uatsjëndayëngaftaca, tmojantjá ndayá chë cuento bétsayanama.

¹¹ As Jesús tojanéjua: “Bëngbe Bëtsá tsëngaftanga cmontsinÿanÿná nyetsca chë mo iytëmencá yomna soyënga chabe amëndayama, pero chë ínÿengbioye ndoñe; chë soyëngama chënga lempe cuentëngaca sëntsëtsëtsná.

¹² Chca, masque beca chamotsafšna, ndoñe chamondobená chë Bëngbe Bëtsabe soyënga jinÿama; y masque beca chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

*Jesús chë jenabe cuentama tojanabuayená
(Mt 13.18-23; Lc 8.11-15)*

¹³ Chentsana, Jesús tojanéyana: “¿Quem cuentama ndoñe tcmonjósertase, ntšamo chc case nyetsca cuentëngama cmochjóserta ca?”

¹⁴ Chë jená endmëna chë tsabe noticiëngama abuayiynayá.

¹⁵ Básefta entsanga mondmëna mo chë be-nache juachañe yojuatquécjana jenaycá. Chëngna

Bëngbe Bëtsabiana soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema.

¹⁶ Inye entšanga mondmëna mo chë ndëtsbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana;

¹⁷ pero ndoñe nyets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inyënga mochantsëbuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye.

¹⁸ Inyënga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena,

¹⁹ pero quem luarentša soyëngaca oyejuayënga jtsemnama yapa mochántseboše, y nye bomnana jëftsebomnama yapa mochanjésenojuabnaye. Chë soyama y inye ba soyëngama yapa enócochinýena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá.

²⁰ Pero ínýënga mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nyets ainánaca mochántseprontana chiñe jtsošbuáchiyama. Mo canye betiye becá tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inyënga ínýëngbiana más

bëtská soyënga mochanjama; y chca, ínÿenga mochántsemna mo chë unga bnëtsana meshe tojanshajo jenaycá, ínÿenga mo chë chnënguana bnëtsancá, y ínÿengna mo chë patse meshënga tojanboté jenaycá ca” –Jesús tojánayana.

Chë uajuinÿanëshama cuento
(Lc 8.16-18)

²¹ Mëntsánaca Jesús tojánayana: “Ndocná juiyëbana canÿe uajuinÿanësha cajonëshe o jutsnësha tajsoye juajájuama. Ndoñe; uajuinÿanësha juiyëbana tsbanánoca juajájuama, lempe chaotsebínÿnama.

²² Ndocna yoiytëmena soye ntjinÿencá queochaisoquéda, y chë ndótatsëmbo soye ntsotatsëmbcá queochaisoquéda.

²³ Chë jouenama tmojtsobenënga, šmochjouena ca.”

²⁴ Y mëntsánaca Jesús tojanëyana: “Tšabá šmochjájuaboye ntšamo šmojtsuenanama. Nÿe batšatema šmojouenëse, nÿe batšatema cmochanjósertaye; pero aíñe tšabá šmojouenëse, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama.

²⁵ Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nÿe batšá ibosertana soyëngama bochántsebnatjëmba ca” –cha tojánayana.

Chë ojuajna jenayama cuento

²⁶ Jesús mēntśánaca tojaněyana: “Bēngbe Bětsabe amēndayana endmēna mo ntśamo canye boy-abása jénaye tojuatbontśa ora ehandbopasacá:

²⁷ masque cha cada ibeta jtsojájuaana y bněté jots-banama, ibeta o bněté, chē jénayentśana juabocnana y juájuaana, ntśamo chca yojtsájuaajnama chē boyabása ntjatstatśēmbcá.

²⁸ Chē fshantse cachabe ponto jamana ndayánaca chiñe chaójuama; natsana tsbuanachētēma jóbocnana, chentśana chē espiga, y chentśana chē meshēnga jashájonana.

²⁹ Y chē meshēnga ya tojtsebóchichna orna, játbanama jabocnana, chē saná josháchiñama ora ya tojobuácheyeca ca” —Jesús tojánayana.

Chē mostaztiye jenayama cuento

(Mt 13.31-32; Lc 13.18-19)

³⁰ Jesús mēntśánaca tojaněyana: “¿Ndayacá Bēngbe Bětsabe amēndayana yomna, o ndaye sóyeca nanjopódia chama jábuayenama?

³¹ Endmēna mo canye mostaza jénaye jajoca tcojajecá. Ndegombre, nyetsca quem luarentśa jenayēngama, mostaza jénaye chē más básētema endmēna;

³² pero tcojajé orna, jójuana, y jajañe chē más bēts betiye jóbemana, ba bēts buacuashēngaca; chíyeca chē jaja shloftśēnga jana y chiñe uajajonētemēngá jauábopormana ca.”

Ndáyeca Jesús cuentēngaca entśanga yojanabuayiná

(Mt 13.34-35)

³³ Chca Jesús Bēngbe Bětsabe soyēngama entśanga yojanabuatambá, ba cuentēnguentsana, mo chē

tmonjouena cuentcá, ntsachetsá chë entsanga josértama tmojobenacá.

³⁴ Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiyná, cányenga tmojtsemna ora.

Jesús chë binýia y chë béjaye bonguana yojëtsbema

(Mt 8.23-27; Lc 8.22-25)

³⁵ Cach te, yojtseibétatana ora, Jesús chabe uatsjëndayënga tojanëyana: “Uafjajónaye chenguana cuajna ca.”

³⁶ Chorna, chë entsanga jesabáshejuanëse, chë uatsjëndayënga Jesús tmojtsanánatseñe, cach yojánenjaquena barquëshañe; y inýe entsángnaca inýe barquëshangañe tmojanasto.

³⁷ Chentsana, chë uafjajónaye béjayiñe tša jabuache binýia yojóshjango; olëshënga chë barquësha imojtsëtsbotsana, y chë causa chë barquësha yojóntša búyeshëca jtsobuajútjiana.

³⁸ Y chëntscuana, barquësha stëtsoica, tsëntsenëshañe Jesús yojtsomañe. Chora chë uatsjëndayënga tmojtsanfšená y tmojaniyana: — ¡Buatëmbayá! ¿Tondayana cmontsentšamna bënga chašotsënatjëmbama ca?

³⁹ As Jesús tojantsbaná, chë binýia tbojanácacana, y chë bëts uafjajónayoye tojánayana: — ¡Natjëmbana cochtsemna! ¡Bonguana ca!

Y cachora chë binýia yojëtstëcja, y lempe bonguana yojtsatsmëna.

⁴⁰ Chora chabe uatsjëndayënga tojanëyana: — ¿Ndáyëca tša šmojtsauatja? ¿Bëngbe Bëtsá

tšëngaftanga jujabuáchama yobenama cabá ndoñe šmontsošbuaché ca?

⁴¹ Chama, chënga puerte auatjanánënga imojtsemna y mëntšá imojtsenatsëtsnaye: “¿Nda quem boyabása yomna? Cha tonjayana y chë binÿia y chë béjaye tmonjoyeuná ca.”

5

Chë Gerasa luaroca bacna bayëja uambayá (Mt 8.28-34; Lc 8.26-39)

¹ Chentšana, uafjajónaye chenguánoica tmojánashjaina, Geraseno ca uabaina entšangbe luaroye.

² Jesús barquëshoicana tojánastjango, y cachora, chë obanëngbe cuevëshënguentshana canÿe entšá, bacna bayëjbe juabna uambayá, tojánbocna y tbojanjébengo.

³ Chë boyabásana, obanëngbe cuevëshënguenache inoyena, y ndocná yonjobena cha jtsebátsécana, ni mo cadenëjuangaca;

⁴ er ba soye cadenëjuangaca y inÿe soyëngaca cha nÿetsá tmojanbatsëca, pero cha nÿetsca soye yojtsátabebe y yojtsenájaca, y ndocná yonjobenaye cha bonguana chaotsemnama.

⁵ Nÿets tempo, bnëté y ibeta, obanëngbe cuevëshënguenache y tjañenache yojánana yoye, y ndëtsbéngaca enotsetšenaye.

⁶ Jesúsbioye bënocana tbojáninÿe ora, chábioye tojanótjajo y chabe natsanoica yojoshëntsamentšiyë;

⁷ y mëntšá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá?

¡Bëngbe Bëtsabe delante cboimpadá, ndoñe šcatjatsetšená ca!

⁸ Chca tbojaniyana, er Jesús chábioye tbojaniyana: —¡Bacna bayëjbe juabna, chábentšana maisebocna ca!

⁹ Chentšana Jesús tbojantjá: —¿Ntšamo cabaina ca?

Y chë bacna bayëjëngbe juábnaca cha tbojanjuá: —Atšna Legión ca sënduabaina, bëtscanga fsëndmëna causa ca.

¹⁰ Y tša Jesús ibojtserruana chë luarentšana ndoñe chaondëtëbuacanama.

¹¹ Chentša béconana ba cotšënga imnajena, batsjoca innétsosañe;

¹² as chë bacna bayëjënga Jesúsbioye tmojanimpadá: —Chë cotšëngbioye šmichamó, chëngbeñe fchayamashjna ca.

¹³ Y Jesús aiñe tojanalesenciá; as chë bacna bayëjënga chë entšábentšana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñëšëjana uafjajónayoye imojtsoshbuetše y yojtsatajo.

¹⁴ Chora, chë cotšënga anÿenënga tmojtsanacheta auatjanánënga, y tmojána chama jacuéntama chë puebloca y chabuenache; y entšanga tmojánabo ntšamo tojanopasacá jinÿama.

¹⁵ Jesús yojtsemnoye chë entšanga tmojánashjajna ora, tmojáninÿe chë tempo bacna bayëjënga uambayá, inétsotbemañe, entšayá uichëtjoná y chabe nÿets juábnaca. Y chë entšanga chama imojtsëuatjaná.

16 Chë tmojáninyënga imojtsecuéntaye, ntšamo chë bayëjbe juabna uambayáftaca tojanopasama, y chë cotsëngaftaca ntšamo tojanopasámnaca.

17 Chora chë entsanga tmojanontsé Jesús im-padánana chë luarentšana chaotsatoñama.

18 Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca.

19 Pero ndoñe tbonjanlesenciá, sinó mëntšá tbojaniyana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Útabná ácaftaca tojamama, y ntšamo cha ácbioye tcmojalastemama ca.”

20 Chentšana, chë entsá yojtšatoñe y tojanontsé Decápolis uabaina pueblënguenache jacúntana lempe ntšamo Jesús cháftaca tojanmcá; y nyëtscanga imojtsenjnanaye.

Jesús canye shembásabioye tbojanshná y Jairëbe bembetémbioye tbojtanayená
(Mt 9.18-26; Lc 8.40-56)

21 Chentšana, Jesús cachiñe chë uafjajónaye chenguana tojesaná barquëshañe. Chocna ba entsanga tmojanobuashconá, y Jesús chë uafjajónaye tsachañe yojtsemna.

22 Chorna, tojánashjango chë judiëngbe enefjuana yebnentša canye mandayá, Jairo ca uabainá. Jesúsbioye tbojáninye ora, chábentše tojanoshëntsamentsé,

23 y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjajájua, salud chauat-inyënama y cháuatayenama ca.

24 As Jesús cháftaca tojána; pero bëtscá entšanga imojtséstona, chábioye imojtsenatséntšenaye.

25 Chë entsanguentše vojtsaye canÿe shembása socá; cha ya bnétsana uta uata oboftjajuanánaca inapadecena.

26 Cha puerte tojansufrí, ba ashnayëngbe cucuatšíne, y lempe ntsachetšá inabomncá tojanpochocá jenóshnama; pero ndoñe ibontsatstécacjana, nÿe más peor ibojtsobiamnaye.

27 Chë shembása vojouena ntšamo Jesús ba šoquënga tojánashnama, y as stëtšoicana entšangbe tséntsajana vojobeconá, y Jesusbe entšayá yojauábojajo.

28 Cha chca tojanma, er yojtsejuabnaye: “Masque nÿe mo chabe entšayá sibiájua chajjuábojajo, y salud chantsatsbomna ca.”

29 Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtsatsmënama.

30 Chora Jesús yojaséntia chábentšana obenana yojóbocnama, mo ndábioye tbojashná orcá; as cha tojanobuértana entšángbeñe y tojanatjá: —¿Nda atšbe entšayá tojuabojajo ca?

31 Chabe uatsjéndayënga tmojanjuá: —Aca consonÿá chë entšanga cmontsatséntšená, y cabá cochjátstnoticiaye nda entšayá tojuabojajo ca.

32 Pero Jesús cátoye yojtserreparana jinÿama nda tbojánbojajuama.

33 As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshéntsamentšé, y lempe ntšamo ndegombre cháftaca tojanopasacá Jesúsbioye tbojanianana.

34 Chora Jesús tbojaniyana: –Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

35 Jesús cabá yojtsoyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojaniyana: –Acbe bembe tontsóbana; ¿ndayama más Buatëmbayá chama cochjátebëyaboma ca?

36 Y Jesús, ntšamo chënga imojtsichamcá nt-jatuenancá chë judiëngbe enefjuana yebnentša mandayábioye tbojaniyana: –Ndoñe matauat-jana. Nye Bëngbe Bëtsábeñe cochtsošbuáchiye cha tšabá chaotsatsmënama ca.

37 Y Jesús ndoñe tonjanalesenciá Jairëbe yebnoye banga chamuastama; nye Pedro, Santiago y Juan, Santiagbe uabentsana, aíñe.

38 Chentšana, chë mandayabe yebnoye tmojánashjajna ora, Jesús tojánanyë entšanga tša imojtsenbouenana, entšanga imojtsošachiye y puerte ngménaca imojtseyoye.

39 As chë yebnoye tojánamashëngo y chë entšanga tojanëyana: “¿Ndayama tša šmojtzenbouenana y tša šmojtsendëntjana? Chë shembásetema ndoñe chenatóbana, nye endëtsomañe ca.”

40 Pero entšanga nye imojtsáfchaye. As Jesús nyetsca entšanga shjoye tojtanëbuacna, y tojëftsanëbiatše chë basetembe bëtsëtsata y chabe enutënga; y chë shembásetema yojtsemnoye tojánamashëngo.

⁴¹ Chora Jesús tbojanábuacueshache y cachëngbe biyañe tbojaniana: “Talita, cum ca.” (Chca endayana “Shembásetema, matëtsbaná ca”.)

⁴² Cachora, chë bnëtsana uta uata bomna shembásetema tojtantsbaná y yojtobena jama. Y chë entsanga chama imojtsenjnanaye.

⁴³ Pero Jesús corente tojanamëndá ndocnábeñe chama ntsecuéntayana ca, y tojanamëndá chë bássetema saná chamuiyé chaosama.

6

Jesús Nazaret puebloca

(Mt 13.53-58; Lc 4.16-30)

¹ Chentšana Jesús tojëftsanbocna y cachabe luaroye tojtanashjango, y chabe uatsjëndayënga cháftaca tmojána.

² Ochnayté tojanobuache ora, Jesús tojanontsé chë judiëngbe enefjuana yebnentse entsanga jabuátambana.

Chë ba entsanga cha jóyebuambayama tmojanu-enënga, imojenjnaná y tmojánayana: “¿Ndémoca quem boyabása lempe chca tojuatsjinye? ¿Ndaye osertánana mua tmojatsetá, y ntšámoyeca cha yojtobena chca bëts soyënga jtsamana ca?”

³ ¿Mua ndoñe chë calpintero yondmëna, Mariybe uaquiñá, y chabe catšátanga ndoñe mondmëna Santiago, José, Judas y Simón; y chabe uabëngnaca muentse ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana.

⁴ As Jesús tojanéyana: “Nÿetsca luarënguenache canÿe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luar-entše, ni cachabe pamíllangbenache, ni cachabe yebnentše ca.”

⁵ Chë entsanga chentše chábeñe ndoñe montsanošbuaché causa, Jesús ndoñe tonjanobená ni canÿe bëts soye Bëngbe Bëtsabe obenánaca chentše jëftsemana; nÿe básefta šoquëngbeñe cucuatšënga tojanajajó y tojanashná.

⁶ Jesús ojnananá yojtsemna cachábentša entsanga chábeñe ndoñe montsanošbuaché causa.

*Jesús, chabe uatsjëndayënga tojanichamó Bëngbe Bëtsabe amëndayama jábuayenama
(Mt 10.5-15; Lc 9.1-6)*

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuátambaye.

⁷ Y chë bnëtsana uta uatsjëndayënga Jesús tojánachembo, y utáta ínÿoye tojanichamó, entsángbentšana bacna bayëjënga jtëbuacnama obenana jatšatayëse;

⁸ y mëntsá yojáuyana: “Benachiñama tondaye šmattsambaye, nÿe canÿe jatjonëfja; ndoñe šmattsambaye saná, ni shecnaja, ni crocénana uasnanëchiñe.

⁹ Nduámanëshe šmochjesóshecochëtjo, y nÿe canÿájua šmochjesíchëtjo ca.”

¹⁰ Mëntsánaca tojanéyana: “Posada chacmojúyentšame yebnentše šmochtsoquedañe inÿe puebloye játantscuana.

11 Canÿe luaroye chašmojáshjajna y ndocná posada chacmonjuyentsame, y joyeunayama ndoñe chamontsebošese, chentsana šmochjésebocana, y shecuatsentša polvêshe šmochjésenstoto, chca, chëngbioye jinÿanÿiyama chënga ndoñe tšabá tšëngaftangaftaca tmonjamama ca.”

12 Chentsana, chë uatsjëndayënga tmojëftsanbocana y entsanga imojánabuayiyayey, chë tšabe benache chámuatishachama, bacna soyënga amana jtsajbanase.

13 Entšángbentšana ba bacna bayëjënga tmojtanëbuacna, y ba šoquënga aceitíyeca tmojananëtoto y tmojanashná.

*Ntšamo Juan chë Ubayaná tojanóbana
(Mt 14.1-12; Lc 9.7-9)*

14 Rey Herodes Jesusbiamá yojátatsëmbona, er nÿetsquénache nÿetsca entsanga chabiamá imojtsóyebuambnaye. Entšanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

15 Inÿengna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y inÿengna: “Muana canÿa Bëngbe Bëtsabe juabna oyebuambnayá, mo chë tempsquëngcá ca.”

16 Heródesna ntšamo entsanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentšana tojtayena ca.”

17 Juan cabá ainá ora, Herodes tojanmandá cha chamishache, cadenëjuangaca chamobátsëca

y chca cárceloye jutámíama. Herodes chca tojanma Herodíasbe causa, chabe uabentsá Felipbe shema. Herodes chë shémaftaca tojanobouamá, Felipe cabá ainá ora.

¹⁸ Y chama, Heródesbioye Juan ibojánbuayiyenaye: “Ndoñe quenátslesenciana acbe uabentsabe shema acbe shema chaotsemnama ca.”

¹⁹ Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena,

²⁰ er Herodes yojántatsëmbo, Juan canye nyetsca soyënguiñe tšabá amá, nye Bëngbe Bëtsábioye sempre oservená inamnama. Chama cha yojánauatja y ndoñe yonjanaleséncia cha chamóbama. Y Juan Bëngbe Bëtsabe soyëngama Heródesbioye tbojtsebuayiyená ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana.

²¹ Pero Herodías tojáninÿena mocna ora Juan chamóbama. Heródesbe cumpleño oboyejuaye ora, bëtská saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entsanga.

²² Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nyetsca ófanënga chama tša imojtsóyejuaye. As chë rey, chë tobiásbioye tbojaniyana: —Ndayánaca šmotjañe y atše cbochjátšetaye ca.

²³ Y jajúrase, mëntsá tbojanšbuachená: —Ntšamo chašcotjañcá cbochjátšetaye, masque atšbe amëndayentša bomnantšana tsëntsañnaca ca.

²⁴ Chentšana, chë tobiáše yojëftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

²⁵ Cachora chë tobišaše betesco chë rey yojtsemnoye tojtanamáshëngo, y tbojaniyana: —Atše séntseboše, cam ora Juan chë Ubayanabe bestšaše canyë šcnenëšiñe chašcuatšetá ca.

²⁶ Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojaniyancá jebëbuetámenana.

²⁷ Cachora chë rey canyë soldado ibojíchmua, Juanbe bestšaše chauiyëbama.

²⁸ As chë soldado cárceloye tojána, Juánbioye bestšaše tbojtsanëštjango, y canyë šcnenëšiñe tojanamba. Chë tobiášbioye tbojanëntšabuaché, y chana, chabe mamábioye.

²⁹ Juanbe ústonënga chama imojátatšëmbona ora, choye tmojánashjajna, chabe cuerpo tmojésanocñe y jauátbontsama tmojána.

Jesús shachna uaranga boyabásenga saná tojanacaredadó

(Mt 14.13-21; Lc 9.10-17; Jn 6.1-14)

³⁰ Chë Jesús tojánichamonga chábioye tmojtanashjajna ora, lempe ntšamo tmojanmama y tmojanabuatambama cha tmojancuentá.

³¹ Chora Jesús tojanéyana: “Cuajna ínñoeye, entšanga ndoyena luaroye, batsatema jóchnama ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebomna.

³² As cányënga barquëshañe tmojtsanoñe, entšanga ndëbínñoeye.

33 Pero chënga imojtsoñama entšanga tmojánanÿe, y ndëmuanyënga imojamnama imojtsetátšëmbo; chcasna, chë entšanga shecuátseca betesco tmojána, nÿetsca pueblënguentsana, y chëngbe natsana choye tmojánashjajna.

34 Chentšana, chë barquëshoicana tojánastjango ora, Jesús ba entšanga tojánanÿe; chëngbiamama tbojanongmé, er imojtsemna mo abujajnyá ndbomna oveshëngcá; y tojanontsé ba soyëngama jabuátambana.

35 Ya jetiñe yojtsemna orna, chabe uatsjëndayënga tmojanobobeaconá y tmojanianyana: —Ya jetiñe entsemna, y quem luariñe ndocná quenatiyena.

36 Entšanga cuantichamuá, pueblotëmëngoye y inÿe luarëngoye chamotsoñama, ndayánaca jasama chamobuámiñama ca.

37 Y Jesús tojanëyana: —Tšëngaftanga saná chëngbioye šmochjacaredádaye ca.

Chora chënga tmojanianyana: —Crocénana queftsátšbomna, uta patse denario nÿetsá, chëfta entšangbiamama saná jabuámiyama ca.

38 As Jesús tojanëyana: —¿Bueta tandëše šmojtsebomna? Marrepáranga ca.

Ya imojtsetátšëmbo ora, tmojanianyana: —Shachna tandëše y uta beónata fsëntsebomna ca.

39 Chora Jesús entšanga tojanamëndá ínÿoca ínÿoca chamoshëntsijatbiamama.

40 As chënga tmojanotbiamama patse patsënga y shachna bnëtsátšanënga.

41 Chora Jesús chë shachna tandëše y chë uta beónata tojanca, y celoye jontješiyëse, Bëngbe

Bëtsábioye chama tbojtanchuá. Chentšana chë tandëšënga tojanjatá y chabe uatsjéndayënga tojanayentšbuaché chë entšanga jatšatayama. Y chë uta beónatnaca nÿetscanga tojanëjáyaye.

⁴² Nÿetscanga tmojanse jtoshachaye nÿetšá.

⁴³ Y chentšana, chë tandëše y chë beonentšana ojamnëtémënga tmojanatbaná, y bnëtsana uta sbarëcua tmojanajutjé.

⁴⁴ Chë saná tmojansënga imojamna shachna uaranga boyabásenga, shembásenga y básenga ntjacentacá.

*Jesús béjaye juatsbuacá yojtsaye
(Mt 14.22-27; Jn 6.16-21)*

⁴⁵ Chentšana, Jesús chabe uatsjéndayënga tojanamëndá chë barquëshoye jtašjnama, chë uafjajónaye chenguana jangana y chabe natsana Bet-saida ca uabaina puebloca jashjajnana. Chënga imojtsebocanëntscuana, Jesús chë entšanga yojtichamuá.

⁴⁶ Nÿetscanga tojtanadiošoftá ora, tjoye cha tojt-sanoñe Bëngbe Bëtsáftaca jencuéntama.

⁴⁷ Yojtseibétatana ora, chë barquëshu uafjajónaye tsëntsaca yojtsamna, y Jesús, canÿa fshantsoca.

⁴⁸ Jesús tojáninÿe chëngbiana totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿana ora, chëngbioye yojobeconá, béjaye juatsbuacá yojtsaye, y ya chëngbiajana nÿe ndericho jachnënguama yojtsemna.

49 Y chënga, chë béjaye juatsbuacá cha yojt-sayama tmojáninÿe ora, tmojanjuabó cha canÿe añemëse yojtsemna ca, y tmojanontsé yoyana;

50 er nÿetscanga chca tmojáninÿe y cochauat-janánënga imojtsemna. Pero Jesús cachora to-janëyana: “¡Añemo šmochtsebmna; atše Jesús sëndmëna; ndoñe matauatjëngana ca!”

51 Chorna, chënga imojtsemna barquëshoye cha tojánasëngo, y chë jabuache binÿia tojanëjbana, y nÿetscanga puerte auatjanánënga y ojanánënga imojtsemna.

52 Chënga tmojáninÿe chëfta entšanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

Genesaret ca uabáinoca Jesús ba šoquënga to-janashná

(Mt 14.34-36)

53 Chë uafjajónaye tmojánenashbuachengo ora, Genesaret ca uabaina luaroye tmojánashjajna, y chë uafjajónaye tsachoca chë barquëshha tmo-janëtsbua.

54 Chë barquëshoicana tmojánastjajna y cachora entšanga Jesús tmojantëmbá.

55 Chíyeca, chë luariñe yebnënguenache betsko chënga tmojána, y tmojanontsé chë šoquënga tjuashënguiñe juyambana, chë ndëmoye tmojanuena Jesús yojtsemna luaroye.

56 Y ndayentše cha tojámashëngüentše, pueblënguiñe, bëts pueblënguiñe y base pueblotëmënguiñnaca, chë šoquënga benachoye imojtsëbuacana, y Jesús corente imojtseimpadana

chë šoquënga chaualesenciá, nÿe mo chabe entšayá sibuájua juabojajuana. Y nÿetscanga tmojuábojajënga tšabá imojtsatsmëna.

7

*Ndáyeca canÿe entšá Bëngbe Bëtsabe delante ndoñe tšabia nántsemna
(Mt 15.1-20)*

¹ Chentsana, fariseunga Jesúsbioye tmojanobeconá y báseftanga ley abuátambayëngnaca, Jerusalenocana áshjajnënga.

² Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá.

³ Er chë fariseunga y nÿetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tšábenga jtsatsmënama ca.

⁴ Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero nÿe chëngbe bëts taitanga chca jamana imojanamánayeca, mo chë béjayeca juabáyana tazësënga, matbajënga, calderëshënga y jutsnëshangá.

⁵ Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëts taitanga monjanamancá, y montsesá ntsacuéntšabiase, ndoñe ntšamo bënga judiënga

fsënduamancá, Bëngbe Bëtsabe delante tšabá jtsatsmënema ca?

⁶ Chora Jesús tojanéyana: —Nýe tšabá chë Bëngbe Bëtsabe juabna oyebuambnayá Isaías tšëngaftangbiama tojánayana, bacna entšanga chë ntšamo ndegombre šmojuabnacá ndinýinýnayënga ca, mëntšá enduabemanentše:

Quem entšanga mondbétsichamo Bëngbe Bëtsá tša tšabia yomna ca; chca nýe uayášaca, pero chëngbe ainanentše ndocna tšabe juabnéngaca.

⁷ Pero chënga nýe bonamente mondbétsichamo Bëngbe Bëtsá tša tšabia yomna ca;

chënga nýe entšangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

⁸ Chora Jesús tojanéyana: —Ntšamo Bëngbe Bëtsá tojanmandacá stëtsoye tšëngaftanga šmojtsequedá, nýe ntšamo entšanga monduamancá jtsamama ca.

⁹ Y mëntšánaca tojanéyana: “Tšëngaftanga ntšamo Bëngbe Bëtsá tojanmandacá stëtsoye jtsequédana, nýe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojtsama ca chca šmojtsama ora.

¹⁰ Moisés tonjánayana: ‘Acbe bëtsétsata ndoñe stëtsoye catjáquedaye’, y ‘nda chabe bëtsétsatbiama ndoñe tšabá tonjoyebuambá chana, jóbanama jtsemnana ca.’

¹¹ Pero tšëngaftanga šmondbétsichamo, canýe entšá yobena chabe taitá o chabe mamá jáuyanana:

‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiama uátšëmbona soyënga ca”).

¹² Tšëngaftanga šmondbétsichamo, nda chca tojayanëse, ya ndoñe obligaciönaca ntsemnana chabe taitá o mamabiama ndayánaca jamama ca.

¹³ Chca, tšëngaftanga šmontsama entšanga Bëngbe Bëtsabe palabra stëtšoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entšángbeñe tempscana y méntscoñama yochnějuancá. Y ba soyënga tšëngaftanga cachcá šmontsama ca” —Jesús tojánayana.

¹⁴ Chora Jesús, cachiñe entšanga tojtanachembo y tojanéyana: “Nÿetscanga šmochjouena y chacmësertá.

¹⁵ Ndayá entšá tojtsesacá, ndoñe ntjábemana ndoñe tšabia Bëngbe Bëtsabe delante. Inÿetšá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante.

¹⁶ Chë jouenama tmojtsobenënga, šmochjouena ca” —cha tojánayana.

¹⁷ Jesús entšanga tojéftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama.

¹⁸ As cha tojanéyana: “¿Tšëngaftángnaca cabá ndoñe cmontsësertana ca? ¿Cabá ndoñe cmontsësertana, lempe ntšamo entšá tojascá ndoñe ntsobenana chábioye jabemana ndoñe tšabia Bëngbe Bëtsabe delante;

19 er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nyetsca sananga tšabá jasama yomna ca y chë saná ndoñe ntjamana canye entsá bacna soye chaotsamama ca.

20 Y mëntšánaca tojánayana: “Ntšamo chë entsá tojtsejuabná y tojtsoyebuambnacá, chë soye cocayé endobena entsá jabemana ndoñe tšabia Bëngbe Bëtsabe delante.

21 Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama,

22 bacna juabnënga boyá o shémbioye ínÿaftaca jáingñama, jtsatbomnayama, nyetsca bacna soyënga jamama, ínÿenga jáingñama, nye cachá jenomándama ntsobencá jtsiyenama, ínÿabioye jtsántšabošama, ínÿabiamama jtsayátsenayama, jtsenábotamnayama y nye opënga jtsobiamnayama.

23 Nyetsca quem bacna soyënga entsabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

Canye shembása inÿe luarocana ashjagoná Jesúsbeñe yojtsošbuaché

(Mt 15.21-28)

24 Jesús chentšana, Tiro ca uabaina luaroye tojtsanoñe, y canye yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana.

25 Y betesco, canye shembása, canye bembe bacna bayëjbe juabna uambayá ibnabomná, Jesusbiamama

oyebuambnayana vojouena ora, chábioye tojánabo y chabe shecuatšentše tojanoshěntsamentšé.

²⁶ Chě shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetémbentšana bacna bayėja chabuataáocnama.

²⁷ Pero Jesús tbojaniyana: —Atše šondmēna natsana judío entšangbiamá chě soyēnga jamana; chentšana cocayé chanjobenaye chca inye entšangbiamá jamana. Atše acbiamá, canye ndoñe judiá, soyēnga stjamēse, nántsemna mo chě básengbe saná quešēnga cuaftsēbuajocá ca.

²⁸ Y cha tbojanjuá: —Arseñor, chca jtsemnana. Pero chě quešēngnaca mondbase chě básēnga tmojtšesá ora tmojatquécjanatemēnga. Chcasna, Diosmanda átšnaca šmotsajabuache ca.

²⁹ As Jesús tbojaniyana: —Tšabá tcjayana; chcasna, acbe yebnoye motsatoñe. Chě bacna bayėja acbe bembetémbentšana tonjésebozna ca.

³⁰ Chentšana, chě shembása chabe yebnoye tojtaná, y tbojáninýena chě bembetema jutsnėshentše yojtsojajoñe, y chě bacna bayėja ya ndoñe chábeñe yontsemna.

Jesús, canye boyabása tēsmá y ndėbiábioye tbojan-shná

³¹ Tiro pueblentšana Jesús tojěftsanbozna, y Sidón y Decápolis luarentša pueblėnguējana jachnėnguse, Galilea uafjajónayoye tojánashjango.

³² Cha chentše yojtsemna ora, chábioye tmojanánatse canye entšá tēsmá y ndėbiá, y tmojanimpadá chabe cucuatšēnga chě šocábeñe chaojájoma, chaboshnama.

³³ Chorna Jesús entšángxbentšana luaroye tbojanánatse, cánŷata. Chora chë šocabe matscuašoye ntšabuafjēnga yojajué, cucuatšīne yojabuashētjo, y chë šocabe bichtaja yojábojajo.

³⁴ Chentšana, Jesús celoye tojanontješé, jabuache yojáshachna, y hebreo palabriñe tbojanianyana: “¡Efata ca!” (Chca endayana “¡Chacmotsauenana ca!”)

³⁵ Cachora, chë boyabásabe matscuaše tšabá yojtsatsmēna y tšabá yojtsuenana; chë bichtaja tšabá yojtóbema y tšabá yojtsóyebuambnaye.

³⁶ Y Jesús chë entšanga tojanamēndá chama ndocnábeñe ntsecuéntayana. Pero masque tša chama yojtsamēndaye, entšanga más chabiamama imojtsencuéntaye.

³⁷ Chama chë entšanga puerte imojtsenjnanaye, y mēntšá imojtsichamo: “¡Lempe tšabá entsama! Chë tēsmēnga chamouenama, y chë ndēbianga chamóyebuambama entsama ca.”

8

Jesús canta uaranga entšanga saná tojanacaredadó
(Mt 15.32-39)

¹ Chë tempo, ba entšanga Jesúsbioye cachiñe tmojanobeconá, y jasama tondaye imontsebmoma. As Jesús chabe uatsjéndayēnga tojánachembo y tojanéyana:

² —Quem entšangbiamama šontsengmena, er ya unga te átšeftaca montsemna y mora jasama tondaye quemátsbmoma.

³ Cachëngbe yebnoye tondaye ntjascá stichamuase, shëntsama benachëjana nantsabu-atëcja; y báseftanga bën luarocana tmojabo ca.

⁴ As chabe uatsjëndayënga tmojaninyana: — ¿Ntšamo nda nanjobenaye quem luarentše, ndocna entšá ndoyenentše, chëfta entšangbiama saná jinÿenama ca?

⁵ Chora cha tojanatjá: —¿Bueta tandëse šmojtsebomna ca?

Y chënga tmojanjuá: —Canÿsëftaše ca.

⁶ Chentšana, Jesús tojanamëndá entšanga chamoshëntsjatbiamama. Chorna, chë canÿsëfta tandëse tojanca y Bëngbe Bëtsábioye chama tbojtanchuá. Chentšana tojanjatá, chabe uatsjëndayënga tojanëjatá, y chëngna chë entšangbioye.

⁷ Básefta beonatémëngnaca innabomna; as Jesús, Bëngbe Bëtsábioye chama tbojtanchuá y chabe uatsjëndayënga tojanamëndá entšanga jujátayama.

⁸ Nÿetscanga tmojanse jtoshachaye nÿetšá. Chentšana cabá canÿsëfta bëts sbarëcua tmojanajutjé chë ojamnëtémëngaca.

⁹ Chë tmojansënga imojamna mo canta uaranga nÿetšá. Chentšana Jesús chë entšanga tojtana-diošoftá.

¹⁰ Chora Jesús barquëshañe tojánenoyaiye chabe uatsjëndayëngaftaca, y tmojtsanoñe Dalmanuta ca uabaina luaroye.

Chë fariseunga tmojánbošena, Jesús chaoma canÿe bëts soye, chabe ndegombre obenana jinÿama (Mt 16.1-4; Lc 12.54-56)

11 Chentšana, fariseunga tmojánabo y tmojanontsé Jesúseftaca enatsëtsnayana. Y jisháchichiyama, imojtseimpadana canye bëts soye chaoma, as jtsetatšëmbuama Jesusbe obenana Bëngbe Bëtsábiocana ndegombre tainóbocanama.

12 Y Jesús ngménaca, jabuache yojáshachnëse, mëntsá tojánayana: “¿Ndáyeca tšëngaftanga, chë mora oyenënga, šmojtseboše canye bëts soye chaimama tšëngaftanga atšbe obenana jinÿanÿiyama ca? Ndegombre cbëyana, quem entšanga ndocna chca soye quemochátinÿe ca.”

13 Chorna chë entšanga cachcá tojesanënyá, chë barquëshoye yojtamáshëngo, y uafjajónaye chenguana yojtsoñe.

Jesús tojanabuayená fariseungbe buatëmbana soyëngama

(Mt 16.5-12)

14 Chë uatsjëndayënga yojésebnëtjomba ndaye soye jasama jesocñama, y chë barquëshoye nÿe canÿe tandëse imojtsebomna.

15 Jesús tojanëyana: —Smochtsantješna; cuedado šmochtsebomna fariseunga y Heródesbe levadurama ca.

16 Chora chë uatsjëndayënga tmojanontsé enatsëtsnayana: —Chca entsichamo, bënga tandëse ndoñe tmonjesocñama ca.

17 Jesús yojtsetátšëmbo, chabe uatsjëndayënga imojtsejuabnaye chana tandëšama yojtsëtsëtsnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntsá tojanëyana: —¿Ndáyeca

tandësama šmojtsoyebuambná? ¿Cabá ndoñe cmontsésertana, ni šmontsetátšëmbo? ¿Ainanoca ndoñe šmontseboše chacmésertama?

¹⁸ Bominÿe šmondbomna, pero ndoñe quešmátobena jinÿana; jouenama šmondobena, y ndoñe quešmátuenana, y ndayá tijamama ndoñe quešmatsjuabná.

¹⁹ Chë shachna uaranga entsanga shachna tandësentsana sënjanëjatá chentsana, ¿bueta sbarëcua chë ojamnëtemëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácua ca.

²⁰ —Y chë canÿsëfta tandësentsana canta uaranga entsanga sënjanëjatá chentsana, ¿bueta bëts sbarëcua chë ojamnëtemëngaca šmënjanajutjé ca?

Y chënga tmojanjuá: —Canÿsëftácua ca.

²¹ As Jesús tojanëyana: —¿Y cabá ndoñe cmontsésertana ca?

Jesús canÿe jtanábioye tbojanshná, Betsaida puebloca

²² Chentsana tmojánashjajna Betsaida puebloca; y chora, entsanga canÿe boyabása jtaná Jesúsbioye tmojanánatse, y tmojanimpadá cha jaboajuana chabotseshnama.

²³ As, chë jtanábioye tbojanábuacueshache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinÿama tayojtsanobena ca.

²⁴ As chë jtaná yojontješiye y tojánayana: —Boyabásenga sëntsënÿa; mo betiyëngcá montsemna, pero montsobonjná ca.

25 Chora Jesús, chë jtanabe fšněbeñe cachiñe cucuatšënga yojajájua. Y chë boyabása yojtsobena lempe tšabá jinýama; ya shnaná yojtoquéda. Y yojtsobena nyetsca soyënga botamana jinýana.

26 Chentšana, Jesús cachabe yebnoye tbojtanichmó y mēntšá tbojaniana: –Chë puebloye ndoñe catjěftsamashëngo ca.

Pedro tojánayana, Jesús chë Cristo bétsemnama

(Mt 16.13-20; Lc 9.18-21)

27 Chentšana, Jesús tojánbocna chabe uatsjéndayëngaftaca Cesarea de Filipino luaroca pueblëngoye, y benachiñe chabe uatsjéndayënga tojanatjá: –¿Nda atše bétsemnama ca entšanga imojtsichamo ca?

28 Y chënga tmojaniana: –Inýënga montsichamo Juan chë Ubayaná ca, ínýengna Elías ca, y ínýengna, canýe Bëngbe Bëtsabe juabna oyebuambnayá ca.

29 As Jesús tojanatjá: –Y tšëngaftangna, ¿nda atše bétsemnama ntšamo šmochjayana ca?

Y Pedro tbojanjuá: –Acna chë Cristo condmëna, chë Bëngbe Bëtsabe Uámana Uabuayaná ca.

30 Chentšana Jesús corente chënga tojanamëndá, chë nda cha yojamnama ndocnábeñe ntsecuéntayana.

Jesús tojánayana cha ibojamna jóbanana y jt-sayenana ca

(Mt 16.21-28; Lc 9.22-27)

31 Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entšá tbojanbemá, ibojamna puerta jasúfriana ca; chë judiëngbeñe bëtšëjemëngcá amëndayëngbiana, chë

judiëngbe más uámana bachnangbe amëndayënga y ley abuátambayëngbiana uabotená jtsemnana ca. Entšanga mochjanóba, pero unga tianoye yochtanayena ca.

³² Njëtscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana.

³³ Pero Jesús vojjobuértana, chabe uatsjéndayënga tojanënñanýé, y Pédrëbioye mëntsá tbojtsanbochembo: “¡Satanás, átsbentšana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nýe entšángbentšana ca.”

³⁴ Chentšana, Jesús chabe uatsjéndayënga y chë inýe entšanga tojánachembo chamouenama, y tojanéyana: “Nda atšbe uatsjendayá jtsemnama tojtseboše, cháuyana nýe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiana jasúfriama chaotseprontana y cruciñe jobanámnaca.

³⁵ Nda tojtsama quem luarentše bëtscá soyënga jtsebomnama y atšbiana jasúfriama ndoñe tontseprontana, chë nýetsca tescama yomna tšabe vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe noticiënga atšbiana abuátambaye causa, masque chaóbana, chë nýetsca tescama yomna tšabe vida echántsebomna.

³⁶ ¿Ndayama entšá buanjósérvia nýetsca quem luarentša soyënga jtsebomnana, chë nýetsca tescama yomna tšabe vida tojtsoperdese?

³⁷ Er canýe entšá chë nýetsca tescama yomna tšabe vida tojtsoperdese, ndocna soye

quenátsmëna cha chaobená joyiyama, chë nyetsca tescama yomna tšabe vida jtsebomnama.

³⁸ Chcasna, nda mora atšbiamá y atšbe buayenana soyëngama tojtsëuatja entšángbeñe, chënga chë Bëngbe Bëtsabiamá nduauenanënga y bacna soye amënga, chë Bëngbe Bëtsá Entšá tbojanbemánaca chabiamá echantsëuatja, chabe Taitabe bëts obenánaca y chabe angelëngaftaca chaojésabo ora ca” –cha tojanëyana.

9

¹ Mëntsánaca Jesús tojanëyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjéftsinyá ca.”

Jesús inyetsá tojanobinýná
(Mt 17.1-13; Lc 9.28-36)

² Chentšana chnënguana tianoye, Jesús tojéftsanëbiatše Pedro, Santiago y Juan, y ínÿoye tojanënatse nÿe chënga, canÿe bëts tjoye. Y chëngbe delante Jesús inyetsá tojanobinýná;

³ chabe uichëtjonëjuangá tša yojtsabuash-inýinyána; corente uafjantsëjuangá yojtsamna; nÿa chca juafjantsama ndocná quem luarentše quentatobenaye.

⁴ Chca orna, chë uatsjëndayënga tmojáninÿe, Moisés y Elías tbojanobinýná Jesúseftaca encuéntaye.

⁵ Chora Pedro, Jesúsbioye tbojanianyana: “¡Buatëmbayá, tša tšabá bëngbiamá cuanmëna muentše jtsemnana ca! Mora fchanjapórma

unga tambotémenga: cányetema achiama, ínyetema Moisesbiana y ínyetema Elíasbiana ca.”

⁶ Chca tojánayana, chë uatsjédayënga yapa au-atjanánënga imojtsemna causa, y Pedro ndoñe yontsetátšëmbo ntšamo jayanana.

⁷ Chora canye jantšeteshe yojóbema, y chëngbioye yojáutsbotse; y chë jantšeteshoicana canye oyebuambnayana tojanóbocna, mëntšá: “Mua atšbe bonshana Uaquiñá endmëna; cha šmochtseyeunana ca.”

⁸ Y ndeolpe, chëngbe shëconana tmojanrrepará ora, ya ndocná más tmonjáninye; nye Jesús canya chëngaftaca yojtsemna.

⁹ Chë tjocana imojtsatstsmaye ora, Jesús chë uatsjédayënga tojanamëndá: —Bëngbe Bëtsá Entšá tbojanbemá obanënguentšana candétayenëntscuana, chë mënté tjoca šmonjinye soyama ndocnábeñe šmattsecuëntaye ca.

¹⁰ Chë uatsjédayënga aíñe chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora.

¹¹ Y Jesúsbioye imojtsetjanaye: —¿Ndáyeca chë ley abuátambayënga mondbëtsichamo, canmëna Bëngbe Bëtsabe Uámana Uabuayanabe natsana Elías jabanana ca?

¹² As cha tojanējua: —Ndegombre, canya Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bëtsabe uabemana palabrënguiñe endayancana, Bëngbe Bëtsá Entšá tbojanbemá puerte caochjasúfria, y ínÿenga puerte camochtsáboyënja ca.

13 Ndegombre cbëyana, canya Eliascá ya tonjabo, y cháftaca entšanga tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrënguifne endayancá.

Jesús, canye basa bayëjbe juabna uambayábioye tbojanshná
(Mt 17.14-21; Lc 9.37-43)

14 Chentšana, chënga tmojtaná chë inye uatsjëndayëngbioye. Chora, Jesús tojáninye ba entšanga chë uatsjëndayëngbe shëconana imojtsemnama, y básefta ley abuatambayëngna chëngaftaca imojtsenatsëtsnaye.

15 Nÿetsca entšanga cha tmojáninye ora, imojen-jnaná y tmojanótjajo cha jachuayama.

16 Chora Jesús chënga tojanatjá: —¿Ndayama chëngaftaca šmenatsëtsná ca?

17 Y canya entšanguentsá tbojanjuá: — Buatëmbayá, muentše ácbioye sënjuánatse atšbe uaqiñá; bacna bayëjbe juabna entsambá, y chë causa, jóyebuambayama ndoñe quenátobena.

18 Nÿe ndayéntšnaca cha tojtsemnentše, chë bayëja chábioye jishachana y jtsenajuáchesënjana; chentše uayoicana shashiye jtsabocanana, jtsenoftëšfjojnayana y obanacá jtsatsjájonana. Acbe uatsjëndayënga sënjaimpadá chë bacna bayëja chamuatábocnama, pero ndoñe chematobená ca —cha tbojaniana.

19 As Jesús tojánayana: —¡Nÿetsá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë bášetema mánatse ca!

20 Chora chë básetema chábioye tmojanánatse; y chë bayëja Jesúsbioye tbojáninÿe ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana.

21 As Jesús chë básabe taitábioye tbojantjá: — ¿Buetayté chca yojtsepása ca?

Y cha tbojanjuá: —Básetema orscana chca;

22 ba soye, chë bayëja chábioye iñoye jtsatmetšana y buyeshoye jtashbuetšana, jtsóbama. Chíyeca, nderado ndayá chabiamama jamama tcojtsobenëse, bënga šmotsalastemá y šmotséjabuache ca.

23 Chora Jesús tbojanianyana: —¿Ndáyeca “ndayá jamama tcojtsobenëse ca” šcjauyana? Nda Bëngbe Bëtsábeñe tojtsošbuáchebiamama lempe endopodena ca.

24 Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Dios-manda, ¡más jtošbuáchiyama šmajabuache ca!

25 Y bëtscá entšanga imojtsójotoma Jesús tojáninÿe ora, chë bacna bayëja tbojtsanbochembo mëntšá: —¡Bacna bayëja, chë básetema tësmá y ndëbiá biamnayá; chábentšana maisebocna y ndocna te más chábeñe catjésamashëngo ca!

26 Y chë bayëja chábentšana yojésebocna, yojtseyoye y chë básabioye jabuache ibojeseshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca.

27 Pero Jesús tbojanábuacueshache y tbojtanatsbaná; y chë básana yojtëtsaye.

28 Chentšana, Jesús canÿe yebnoye tojánamashëngo, y chabe uatsjëndayëngna luaroca

cha tmojantjá: —¿Ndáyeca bēnga ndoñe fsēnjobená chē bayēja jtabocnana ca?

²⁹ Y Jesús tojanējua: —Chca bayējēnga jtēbuacanamna jobenayana nýe Bēngbe Bētsáftaca jencuéntase, chabuájabuachama jaimpádase ca.

Jesús cachiñe tojánayana cha ibojamna jóbanana y jtayenana ca

(Mt 17.22-23; Lc 9.43-45)

³⁰ Chentšana tmojëftsanbocna ora, Galilea lumarējana imojtsajna; y Jesús yojtseboše chama ndocná chaondētsetatšēmbuama,

³¹ er cha chabe uatsjéndayēnga yojtsabuátambaye. Mēntšá cachabiamayaoyanētsētsnaye: “Bēngbe Bētsá Entšá tbojanbemá entšangbe cucuatšīñe mochanjáboshjona; mochanjóba, pero chentšana unga tianoye echántayena ca.”

³² Pero chēnga ndoñe yontsósertana ntšamo Jesús yojtsanētsētsnacá, y chama jatstjanayamna chēnga imojtsauatja.

¿Nda chē más uamaná yomna?

(Mt 18.1-5; Lc 9.46-48)

³³ Chora Capernaum puebloye chēnga tmojánashjajna; y cach yebnentše imojtsemna ora, Jesús chē uatsjéndayēnga tojanatjá: “¿Ndayama benachiñe šmabáyenatsētsnaye ca?”

³⁴ Chēngna nýe iytēca tmojanobiamaya, er benachējana chēnga imnayénatsētsnaye, chēnguentšá nda chē más uamaná bētsemnama.

³⁵ As Jesús tojanótbema, chabe bnētsana uta uatsjéndayēnga tojánachembo y tojanēyana: “Ndánaca

n̄yetscangbiana ch̄e más uamaná jtsemnama tojtseboš̄ese, cha ch̄e más nduamaná chaóbema y n̄yetscanga chaotsaserverna ca.”

³⁶ Chora Jesús can̄ye b̄asetema tbojánishache, ch̄engbe ts̄entsaca tbojanatsá, tbojantbá y ch̄enga tojanéyana:

³⁷ “Ndánaca, átšbeñe ošbuachiyá b̄etsemnayeca, tbojofja can̄ya mo quem basetemcá, chana atše jofjana; y nda atše šojofja, chora cha n̄ye atše ndoñe ntjofjana, sinó ch̄e šojichmó chábioynaca jofjana ca.”

Nda ndoñe b̄engbe contra tontsemná, b̄engaftaca jtsemnana

(Mt 10.42; Lc 9.49-50)

³⁸ Juan, Jesúsbioye tbojanianya: —Buat̄embayá, b̄enga fs̄enjin̄ye can̄ye boyabása, y cha aca jótš̄embon̄ese, bacna baȳjbe juabna entš̄angbentšana end̄et̄ebuacana; pero cha b̄engaftaca ndoñe quenátsm̄ena causa, chama fs̄enjesauyaná ca.

³⁹ As Jesús tbojanjuá: —Ndoñe šmatjuauyaná; er ndocná quenátobena can̄ye b̄ets soye jamana B̄engbe B̄etsabe obenánaca, atše jótš̄embon̄ese, y chentšana atšbe contra jat̄óyebuambnayana.

⁴⁰ Ndegombre, nda ndoñe b̄engbe contra tontsemná, b̄engaftaca jtsemnana.

⁴¹ Y ndánaca, masque n̄ye búyeshtema ts̄̄engaftanga tcmojubuatšatá, ts̄̄engaftanga átšbenga b̄etsemnayeca, chábioye B̄engbe B̄etsá can̄ye uacanana soye bochántatš̄etaye, cha ch̄e ts̄abe soye tojamama ca.

*Resjo yomna, nderado bacna soyënga cuanjama
(Mt 18.6-9; Lc 17.1-2)*

⁴² Chentšana Jesús tojánayana: “Canÿa átšbeñe ošbuachiyábioye mo quem basetemcá, nda tbojaingné atše ustonama chaotsajbanama, más tšabá chabiamana nántsemna canÿe bēts nantsnēbé chamotsetamošēntšbua y mar bėjayoye asentoye chamotsashbuetše chabotsenatjēmbama.

⁴³ Nderado acbe cucuátšeca bacna soye tcojama, más tšabá nántsemna chē cucuatše chacotsenacuéstjango. Acbiamana más tšabá endmēna celoye jamashēnguana nÿetsca tescama vida jtsebomnama, nÿe canÿe cucuatše bomná, y ndoñe nÿets útátšeca infiernoye chacmotocá jama, chē ndocna te yochanjáfsana íñeshoye;

⁴⁴ choca útšenēnga puerte nÿetsca tescama mochanjasúfria. Chēngbioye mochtsasaye mamanga ndocna te quemochatóbana, y chē íñeshe ndocna te queochátsfsana.

⁴⁵ “Nderado acbe shecuátšeca bacna soye tcojama, acbiamana más tšabá nántsemna chē shecuatše chacotsenashecuástjango. Acbiamana más tšabá endmēna cosheto celoye jamashēnguana nÿetsca tescama vida jtsebomnama, y ndoñe nÿets útátšeca infiernoye chacmotsētšena;

⁴⁶ choca útšenēnga puerte nÿetsca tescama mochanjasúfria. Chēngbioye mochtsasaye mamanga ndocna te quemochatóbana, y chē íñeshe ndocna te queochátsfsana.

⁴⁷ “Nderado acbe bomínÿeca bacna soye tcojinÿe y cachca soye tcojama, más tšabá nántsemna chē bominÿe chacotsenobuchjátsēca. Acbiamana más

tšabá endmëna Bëngbe Bëtsabe amëndayoye jamashënguana nÿe canÿe bominÿe bomná, y ndoñe nÿets útabeca infiernoye chacmotsëtšena;

⁴⁸ choca útšenënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë íñeshe ndocna te queochátsfsana.

⁴⁹ “Tamó tšabe soye endmëna. Ntšamo chë tamó canÿe tšabe soye endmëncá, Bëngbe Bëtsá echanjama nÿetsca tšëngangbiana tšábenga chašmotsemnama, chë átšbeñe betsošbuáchema šmojtsepadecena ora šmojauantase.

⁵⁰ Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiana šmochtsemna, chëngbeñe jtsiyenëse ntšamo Bëngbe Bëtsá yobošcá, y nÿetscángaftaca natjëmbana šmochtsiyena ca” –cha tojánayana.

10

Ndayá Jesús tojanabuatambá bouamnënga tmojtšenëtšenama

(Mt 19.1-12; Lc 16.18)

¹ Chentšana, Jesús chë luarentšana tojëftsanbocna y tojána Judea luaroye y Jordán chenguana. Entšanga cachiñe chábiyoye tmojánabo, y cha chënga yojtsabuátambaye, chë ntšamo jamana yojanamancá.

² Básefta fariseunga chábioye tmojanobeconá, y jisháchichiyama mēntśá imojtsetjanaye: — ¿Queojtselesenciana canye boyá chabe shémbioye cachcá jesonýayama ca?

³ Chora cha tojanējua: —¿Ntśamo Moisés chē soyēngama tcmēnjanamēndaye ca?

⁴ Y chēnga tmojánayana: —Moisés tojanalesencia chē boyá chabe shémbioye chabuiyé canye tsbuanácha, ndayēchañe chaotsayana cha ya ndoñe chabe shema yontsemna ca, y chora cachcá chabe shema chabuesonýá ca.

⁵ Chora Jesús tojanėyana: —Tšēngaftanga Bēngbe Bētsabe mandēnga ainaniñe jójēngacñama ndoñe quešmátsboše causa, Moisés chca tšēngaftanga tcmojēftsanamēndá.

⁶ Pero quem luare jobojátśama orna, “Bēngbe Bētsá canye boyabása y canye shembása tonjánabiama.

⁷ Chíyeca, chē boyabása chabe taitá y chabe mamá echanjésabashejuana, chabe shémaftaca jenútanama,

⁸ y chē útatna mo canýacá bochántsemna.” Y chca, ya ndoñe útata quebochátśmēna, sinó nye mo canýacá.

⁹ Chcasna, entśá ndoñe chaondēndbema ndayá Bēngbe Bētsá mo canýiñcá tojēftsema soye ca —cha tojánayana.

¹⁰ Ya cach yebnoca imojtsatsmēna ora, chabe uatsjēndayēnga cach soyama imojtētstjaye.

¹¹ Y Jesús tojanėyana: “Nda chabe shémbioye cachcá tbojesonýá y ínýaftaca tojtóbouamase, cha chē natsana shémbioye inye shembásaftaca

jtseíngñayana; chana canye uabuatmá jtsebomnana.

12 Y chë shema chabe boyábioye cachcá tbojesonÿá, y ínÿaftaca tojtóbouamase, chánaca chë nat-sana boyábioye ínÿaftaca jtseíngñayana; canye uabu-atmá jtsebomnana ca” –Jesús tojánayana.

Jesús, basetémëngbiana Bëngbe Bëtsábioye tbojan-impadá

(Mt 19.13-15; Lc 18.15-17)

13 Entsanga, basetémënga Jesúsbioye tmojanënatse, chauabájajuama y Bëngbe Bëtsábioye chëngbiana chaboimpadama; pero chabe uatsjëndayëngna tmojanontsé chë basetémënga unachayënga jtsëcácanana.

14 Jesús chca tojáninÿe ora, tbojánetna y chë uatsjëndayënga tojanëyana: “Cachcá mónÿaye chë basetémënga átšbioye chamuabo y ndoñe matéuyanana; er Bëngbe Bëtsabe amëndayana endmëna chë mo quem basetemëngcá imomnëngbiana.

15 Ndegombre cbëyana, nda Bëngbe Bëtsabe soyënga ndoñe tonjóyëngacñe mo canye basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

16 Y chë basetémënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tsabe bendicionënga chëngbeñe chaotsem-nama.

Canye bomna entsá Jesúsbioye tojána

(Mt 19.16-30; Lc 18.18-30)

17 Jesús jama tojtëtanontsé ora, canye boyabása chábioye tojanótjajo, chabe shecuatšëntse

tojanoshentsamentšé, y mentsá tbojantjá: —Tšabe Buatëmbayá, ¿ndayá šojtsemna jamana chë nyetsca tescama yomna tšabe vida jtsebonnama ca?

18 Y Jesús tbojanjuá: —¿Ndáyeca “tšabia ca” šcjauyana? Tšabia nýe canýa endmëna: Bëngbe Bëtsá.

19 Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbëba, ndoñe catjuaboínýena, ínÿengbioye ndoñe catjáingñaye ndayánaca jabacama, y acbe bëtsëtsata ndoñe stëtsoye catjáquedaye ca.”

20 Chora chë boyabása tbojanjuá: —Buatëmbayá, atše lempe chë mandënga básetema orscana sëndocumplina ca.

21 Jesús bonshanánaca tbojanonýinýe y mentsá tbojaniana: —Canýe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnjémënga cochtsatšataye; chca, celoca canýe bëts bomnana cochántsebonna. Chentšana, cochjabo y šcochjuasto ca.

22 Pero chë bobóntsbioye inýetsá ibojtsínýnana Jesús chca tbojanianama; y puerte ngménaca yojtá, cha puerte bomná inamna causa.

23 Chora Jesús cátoye tojanrrepará y chabe uatsjëndayënga tojanëyana: —¡Puerte totcá entsemna bomnëngbiana Bëngbe Bëtsabe amëndayoye jamashënguama ca!

24 Chca imojouena ora, chë uatsjëndayënga ojanánënga imojtsemna, pero Jesús cachiñe tojanoyebuambá y mentsá tojanëyana: —Atšbe

básenga; ¡puerte totcá entsemna Bëngbe Bëtsabe amëndayoye jamashënguama!

²⁵ Ndegombre, más paselo endmëna chë coshuf-jentša atëfjnëjana canÿe camello chauachnëngo, y ndoñe canÿe bomná Bëngbe Bëtsabe amëndayoye jamashënguana ca.

²⁶ Pero chë uatsjëndayënga nÿe más imojtsenj-nanaye y imojtsentjanaye: —¿As, nda yochjobe-naye atsbocaná jtsemnana ca?

²⁷ Chora Jesús tojanënÿanÿé y tojanëyana: — Entšanga ndoñe quemátobena jamana canÿa atsbocaná chaotsemnana, pero Bëngbe Bëtsá aíñe; er Bëngbe Bëtsá lempe jamama endobena ca.

²⁸ Chora Pedro tbojaniyana: —Aca contsonÿá, bënga lempe chë fsëndbomna soyënga fsënjéseboshjona y ácaftaca fsëntsajna ca.

²⁹ As Jesús tojánayana: —Ndegombre cbëyana, ndánaca átšbioye jasérviana y chë tšabe noticiënga jábuayenama, tojëseboshjona chabe yebna, catšátanga o uabénanga, bebmá o befta, o básenga, o fshantsënga,

³⁰ cha mora quem luarentše echanjónyëngacñe chama patse soye más yebnënga, catšátanga, uabénanga, bebmanga, básenga y fshantsënga, masque puerte chaosufrima ínÿënga mochántsama; y chë inÿe luarocna, chë nÿetsca tescama yomna tšabe vida echanjónÿëna.

³¹ Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca —Jesús tojánayana.

Jesús cachiñe tojánayana cha jóbanama y jtayenama

(Mt 20.17-19; Lc 18.31-34)

³² Chentšana Jerusalenoye imojtsaye, y Jesús yojtsebnatsana. Chë uatsjéndayënga puerte ojnánánënga imojtsemna, Jesús ndauatjca choye yojtsayama; y inye beca entsanga ústonoye imojtsajnënga, imojtsayáuatja. Jesús cachiñe chabe bnëtsana uta uatsjéndayënga barie tojánachembo y tojanontsé jáuyanana ntšamo cháftaca jopásama yojtsemnana.

³³ Mëntšá tojanëyana: “Tšëngaftanga smontsonyá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšinë mochanjáboshjona, y chënga mochanjayana cha chaóbana ca; y ndoñe judiëngbe cucuatšinë mochanjáboshjona.

³⁴ Chënga mochantsáboyejuana, mochántsebuashëtto, mochántsetjanja y mochanjóba, pero chentšana unga tianoye cha echántayena ca.”

Santiago y Juan, Jesús tmojanimpadá canye pavor cháuabiamama

(Mt 20.20-28)

³⁵ Chora, Santiago y Juan, Zebedeobe uaquiñata, Jesúsbioye tbojanobeconá y tmojaniyana: —Buatëmbayá, bëndata fsëntseboše pavor chašcuabiamama ntšamo chacbojaimpadacá ca.

³⁶ Y Jesús tojanatjá: —¿Ndayá šojtseboše atše tsëndatbiamama chjamama ca?

37 Y chata tbojaniyana: —Aca reycá chacojtemánda ora, cochjaleséncia bëndata fchayobená jótbemana, canya acbe catsbioica y inya acbe uañicuayoica ca.

38 As Jesús tojanéjua: —Ntsamo šmontsotjanañama tséndata ndoñe quešnátstatsëmbo. ¿Ntsamo atše chaitsesufrincá, tséndátnaca cachcá jasúfriama tašatjobenaye? ¿Y entsanga puerte bacá chacmojtsëbuatsená ora, tašochjuánta, ntsamo atše chjauantacá ca?

39 Y chata tbojaniyana: —Aíñe fchanjobenaye ca.

Y Jesús tojanéyana: —Ndegombre tséndátnaca atscá šochanjasúfria, y atšbe causa cmochántsamna bëtscá soyëngama jasúfria.

40 Pero atše ndoñe quetsátobena jamándana nda atšbe catsbioica y atšbe uañicuayoica chaótbemama. Chë útentše entsemna ndëmuanyëngbiana atšbe Taitá tojaprontacá ca.

41 Chë inye bnétsana uatsjëndayënga chca tmojanuena ora, tmojanontsé Santiago y Juánoftaca jotjáyanana.

42 Pero Jesús nyetsca uatsjëndayënga tojánachembo y tojanéyana: “Tšëngaftanga šmondétatsëmbo, quem luarentša amëndayënga lempe jtsemándayana, nya mo nduiñënga cuaftsemncá; y chë bëtsetsa entsanga chëngbe obenánaca jtsemándayana, ntšámnaca jtsamëse, chë inye entsanga sempre chamotsayaunanama.

43 Pero tšëngaftangbeñe ndoñe chca chaondëtsemna. Inyetsá; masna, nda tšëngaftangbeñe chë más uamaná jtsemnama

tojtseboše, cha bontsemna chë ínÿenga jtsaservénana;

⁴⁴ y ndánaca tšëngaftanguentsá chë más uamaná jtsemnama tojtsebošá, bontsemna jtsemnana nÿetscangbiama, mo nÿe ínÿabiama nÿets tempo oservernacá,

⁴⁵ Cachcá, Bëngbe Bëtsá Entšá tbojanbemá ndoñe chenátabo cha chamotseservénama, ndayá ínÿenga jabáserviama. Y mo nda, ínÿenga játsebacama cuafjopagacá, cha echanjóbana ba entšanga atsebácanënga chamotsemnama ca” —cha tojánayana.

Jesús canÿe jtanábioye tbojanshná

(Mt 20.29-34; Lc 18.35-43)

⁴⁶ Chentšana, Jesús y chabe uatsjéndayënga Jericó uabaina puebloye tmojánashjajna. Y Jesús chabe uatsjéndayëngaftaca y bëtská entšángaftaca Jericó pueblentšana yojtšaisebocana ora, Timeobe uaquiñá, Bartimeo ca uabainá, canÿe jtaná lemošna otjanañá, benache juachañe yojtsetbemana.

⁴⁷ Y Jesús Nazaretocá chëjana yojtšachnëjuanama cha yojátatšëmbona ora, tojanontšé mëntšá uayebuáchana: —¡Jesús, Davídbentšana Entšá, šmotselastemá ca!

⁴⁸ Chorna, banga chë jtaná imojtsácacana iytëca chaóbemama. Pero cha más yojtšáyebuache: — ¡Davídbentšana Entšá, šmotselastemá ca!

⁴⁹ Chora Jesús tojantsá y chë ínÿenga tojanëyana: —Chë jtaná mochembo ca.

As chë jtaná tmojanchembo, y mëntšá tmojanianyana: —¡Añemo cochtsebomna; motsbaná! Jesús cmontsechembuana ca.

50 Y chë jtaná, quefsaíya jtsenátsejquëse, yojontsënja y betscó Jesúsbioye yojobeconá.

51 Chora, Jesús chë jtanábioye tbojantjá: —¿Ndayá cojtseboše atše acbiama chjamama ca?

Y chë jtaná tbojanjuá: —¡Buatëmbayá, šmoleseñciá atše chašuatabínýnama ca!

52 As Jesús tbojaniyana: —Motsatoñe. Tšabá jtsatsmënäma Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinýna, y Jesúsbioye benachëjana ibojtsëstona.

11

Jesús Jerusalenoye tojánashjango (Mt 21.1-11; Lc 19.28-40; Jn 12.12-19)

1 Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjëndayata tojanichamó,

2 y mëntsá tojanëyana: “Tsëndatbe natsana entsemna base pueplotémoye motsata. Chašojáshjango y cachora šochanjínýena canýe burrotëma utsbuaná; chábeñe cabá ndocná tonjenojayé. Sochjuajafjoná y šochjuánatse.

3 Nderado nda, ¿ndáyeca šmojtsanachá ca? chacmojátjase, šochjojuá: ‘Bëngbe Utabná bontsájaboto y chora bochantabáiseboshjona ca.’ ”

4 As chata tbojána, y tbojáninýena chë burrotëma tsáshenañe, canýe bëshásañe utsbuaná, y imojua-jafjoná.

5 Y básefta entsanga chiñe imojtsemnënga, chátbioye tmojanëyana: “¿Ndayá šojtsama? ¿Ndáyeca chë burrotema šojtsajafjná ca?”

6 As chata tbojanjuá ntšamo Jesús tojanëyancá; y chë entsanga tmojanalesenciá chë burrotema chamuánatsama.

7 Chentšana, chë burrotema Jesúsbioye tmojanánatse; chë burrotémbeñe chatbe entsáyá tbojanájatse, y Jesús chábeñe tojanenojayé.

8 Bëtsá entsanga chëngbe entsáyá chë benachëjana imojtsanëtétsatsana, y inyengna chë jajoca imojuatëtsetse buacuashangá chiñe imojuacjaye.

9 Y chë natsana imojtsajnënga y chë ústonoyënga mëntšá imojtsaiuáyebuache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá!

10 ¡Tša tšabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

11 Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania puebloye.

Jesús tojánayana canye betiye ndoñe más chaondëshájona ca

(Mt 21.18-19)

12 Yëfsana, Betaniocana Jerusalenoye chënga imojtésajna ora, Jesús tbojánishëntsena.

¹³ Bënocana canÿe higo betiye yojinÿe; as tojána jontješiyama tainashajo o ndoñe. Pero nÿe ts-buanáchënga chiñe yojínÿena, chora ndoñe shajo tempo bétsemna causa.

¹⁴ As Jesús chë higo betiyoye tojánayana: “¡Ndocna te más chacondëshájona entsanga chamosama ca!”

Y chabe uatsjéndayënga imojouena ntšamo cha tojanayancá.

Jesús, Bëngbe Bëtsabe bëts yebnentsana enënga y obuámnayënga tojtanëbuacna

(Mt 21.12-17; Lc 19.45-48; Jn 2.13-22)

¹⁵ Jerusalenoye tmojánashjajnentšana, Jesús Bëngbe Bëtsabe bëts yebnoye tojánamashëngo, y tojanontsé chentšana jtëbuacnana chë chentše imojtsena y imojtsobuámnañënga. Chéntšnaca imojtsemna entsanga canÿe crocénana enënga, y chë crocénana nÿe Bëngbe Bëtsabe bëts yebnentsama inoserverna. Chë entsanga crocénana atrocayëngbe mesëshangá tojtsanenásatajchquëca, y chë palomatémënga enëngbe tšenëšëgnaca;

¹⁶ y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama.

¹⁷ Y tojanontsé entsanga mëntsá jabuátambana: “Ndegombre, Bëngbe Bëtsabe uabemana palabrënguiñe cha mëntsá tojánayana: ‘Átsbe bëts yebna echantsabaina nÿetsca luarentša entsangbiana átšeftaca encuéntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanëyana.

18 Chë bachnangbe más uámána amëndayënga y chë ley abuátambayënga tmojánatatsëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nÿetsca entšanga imojtsenjanaye ntšamo cha yojanabuátambama.

19 Pero yojtseibétatana ora, Jesús chabe uatsjëndayëngaftaca chë bëts pueblentšana yojesóbocñe.

Chë higo betiye tojtsanbuashá
(Mt 21.20-22)

20 Yëfsana cachëse, cachëjana imojtésachnëjuana ora, tmojáninÿe chë higo betiye parejo tbëtëjëngaca yojtsebuashá.

21 Chora Pedro yojenójuaboye ntšamo yojopásama; as Jesúsbioye tbojaniyana: — ¡Buatëmbayá, minÿe; chë tconjayana ndocna te más tšabe betiye chaotsemnama betiye tojtsebuashá ca!

22 Y Jesús tbojaniyana: —Bëngbe Bëtsábeñe šmochtsošbuáchiye.

23 Ndegombre cbëyana, nderado nda quem tjoye tojayana, “¡chentsšana mojuaná y bëts uafjajónayoye motsëshbuetše ca!” y chca tojayana ainaniñe inÿetsá juabna ntjatsbomncá, y ainaniñe puerte tojtsošbuaché ntšamo tojayancá aíñe yochjochnënguama, ndegombre chca echanjochnëngo.

24 Chíyeca cbochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente

šmochtsejuabnaye ya šmojóyëngacñe ca, y ndegombre chca šmochántsebmna.

²⁵ Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiamama tojamama, y cháftaca cabá etonánënga šmojtsemmëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama.

²⁶ Pero inya ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

Jesusbe obenana

(Mt 21.23-27; Lc 20.1-8)

²⁷ Chca tojanopasá chentšana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga,

²⁸ y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jt-samama nda obenana tcmënjatšetá ca?

²⁹ As Jesús tojanëyana: —Atšnaca sëntsebmna canye soye tšëngaftanga jatjayama. Chašmojuase, átšnaca cbochjáuyana ndaye deréchoca atše chca stsama.

³⁰ ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga? Smëyana ca.

³¹ Chora chënga tmojanontsé mëntšá enatsëtsnayana: “ ‘Bëngbe Bëtsá ca’ chamojuase, cha šochanjáuyana: ‘As ¿ndáyeca chë

cha tcmojanabuayená soyënguiñe ndoñe šmonjanošbuaché ca?

³² Pero ndoñe quemuátobena jayanana ‘entsanga ca.’” Chca tmojánayana, er chënga entsangbiana imojánauatja, er nyetscanga imojanjuabná, Juan ndegombre Bëngbe Bëtsabe juabna oyebuambnayá yojamnana.

³³ Chcasna, chënga tmojanjuá: –Bënga ndoñe queftsátstatšëmbo ca.

Y Jesús tojanéyana: –As atše cach ndoñe quechochatéyana ndaye deréchoca atše chca stsama ca.

12

Chë puerte bacna trabájayëngbiana cuento (Mt 21.33-46; Lc 20.9-19)

¹ Chora Jesús tojanontsé cuentëngaca jabuátambana. Mëntsá tojanéyana: “Canýe entšá bëtscá uvas betiyënga yojáje, y chë shëconana yojajëtja. Chë uvasëšangá juantšëtetjamna canýe base luare yojajutjo; y canýe tsbanana jebna soye yojapórma chiñe jtsashanyáma. Chentšana, inýe trabájayënga chë jajañe yojúyentšame, y chana inýe luaroye yojtsoñe.

² Chë uvasëšangá juashacama tempo yojobuache orna, chë jajañe nduiño canýe oservená ibojíchmua chë arrëndayënga jáuyanama ntsachetšá chë nduiño ibojtsotocánama.

³ Pero chëngna, cha imojishache, imojtsejantšetaye, y tondaye ntajatacá imojtichmuá.

⁴ Chentšana, chë nduiño inýe oservená ibojíchmua; pero chana, bestšaše imojtselísia y podesca imojtsóyenguango.

5 Chentshana inya ibojatichmuá, y chana chë arréndayënga imojtsóba. Y bángnaca yojichamuá; pero chëngna, ínÿengna imojtsajantsetaye y ínÿengna imojtsëbaye.

6 “Chë nduiño cabá canya ibojtsábojamna jíchmuama: cachabe bonshana uaquiñá. Cabana, cha ibojíchmuá y mëntsá yojtsejuabnaye: ‘Atsbe uaquiñá cocayé mochanjóyeunaye ca.’

7 Pero chë arréndayënga cha imojinÿe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiana echanjoquéda ca.’

8 Chcasna, cha imojishache, imojtsóba y chë uvas betiyënga jajañentshana más chcoye imojetsëtshena ca” —Jesús tojancuentá.

9 Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inÿe trabájayënga chë uvas betiyënga jajañe echanjárrendaye.

10 “¿Tsëngaftanga ndocna te Bëngbe Bëtsabe uabemana palabra šmëndualía? Chiñe mëntsá endayana:

Chë yebna jebuanënga tmojtsanaboté ndëtšbé, mora chë más bëts uashacuanësentše entsejájona.

11 Chë soye Bëngbe Utabná, Bëngbe Bëtsá chca tojama, y bënga chama ojanánënga fsëntsemna ca.”

12 Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatsëmbona cha

chca tojancuentá jinñanñiyama chënga mo chë puerte bacna trabajayëngcá imojanmënama. Pero entšangbiama imojtsauatja, chíyeca cachcá tmojanonñá y chentšana imojtsóñenga.

Chë Romoca bëts mandadbiama impuesto jtsat-squëcñayama

(Mt 22.15-22; Lc 20.20-26)

¹³ Chentšana chënga, básefta fariseunga y Heródesbe ústonënga Jesúsbioye tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadëngbeñe cha mal jaquédana.

¹⁴ Chënga tmojána y Jesús tmojaniyana: — Buatëmbayá, bënga fsëndétatsëmbo aca ndegombre soyënga cnetsabuátambama, y ndoñe jatuenanana nñe ntšamo entšanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiama bënga impuesto jtsatsquëcñayana? ¿Fchtsatsquëcñaye o ndoñe ca? —chënga tmojantjá.

¹⁵ Jesús yojtsetátšëmbo, chënga bacna entšanga ntšamo ndegombre tmojuabnacá ndinñinñayënga imojamnama; chíyeca tojanëyana: —¿Ndáyeca tšëngaftanga šmojtseboše chë sóyeca atše jisháchichiyama? Canñe denario crocénana šmiyëboñe, atše chayobená jinñyama ca.

¹⁶ As canñe crocénana tmojanoyé y Jesús tojanëyana: —¿Ndabe jubiá quem crocenániñe yo-

jtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

¹⁷ Chora Jesús tojanëyana: —Chcasna, César šmohtoyiye cha ibotocana soye; y Bëngbe Bëtsana cha ibotocana soye ca.

Y nyetscanga chama imojenjaná.

Obanënga jtayenama Jesús tmojantjá
(Mt 22.23-33; Lc 20.27-40)

¹⁸ Chentšana, básëftanga saduceo ca uabaina entsanga tmojána Jesús jinÿama. Chënga imojanjuabná obanënga ndocna te ntayenana ca. Chíyeca, Jesús mëntsá tmojaniana:

¹⁹ —Buatëmbayá, Moisés tojëftsanabema, nderado canÿe boyá tojóbana y básënga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiana básënga jtsabamnama ca.

²⁰ Y chcase, canÿe, canÿsëfta catšátanga monjamna. Chë natsaná tonjanobouamá y tontsanóbana básënga ntjëftsabashejuancá.

²¹ Chentšana, chë ústona uabentsá chë shémaftaca tonjanobouamá, pero chana tontsanóbana, básënga ntjëftsabashejuancá; chë inÿe uabentsáftaca cachcá tonjanopasá.

²² Chca, nyetsca canÿsëfta catšátangaftaca cha tonjanobouamá, pero ndocná básënga ntjëftsabáshejuana. Y chentšana chë shembásanaca tontsanóbana.

²³ Y morna, chë obanënga chamojtayena ora, ¿ndabe chë canÿsëfta catšatanguentsabe shema

chë shembása yochtsemna, n̄yetscanga cháftaca tmojanobouamase ca? –chënga tmojantjá.

²⁴ As Jesús tojanéyana: –Ntšamo Bëngbe Bëtsabe uabemana palabrënguiñe endayancá ndoñe tcmónjosertá, ni Bëngbe Bëtsabe obenanama. Chíyeca ntšamo ndoñe yondmëncá šmóntsichamo.

²⁵ Er obanënga chamojtayena ora, ni boy-abásenga ni shembásenga quemochatóbouamnaye, y chca, chënga mochántsemna mo celoca angelotemëngcá.

²⁶ Y chë obanënga jtayenama, ¿Moisesbe librëšañe ndoñe šmëndualía ntšamo Bëngbe Bëtsá tbojanianama, chë betiyetema yojsángbototjuana ora? Bëngbe Bëtsá mëntšá tbojaniana: “Atše sëndmëna Abraham, Isaac y Jacobëbe Bëtsá ca.”

²⁷ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga can̄ye ndoñe ndegombre soyiñe šmóntsemna ca –tojanéyana.

*Chë más bëts uámana mando
(Mt 22.34-40)*

²⁸ Chentše yojtsemna can̄ye ley abuatambayá. Cha yojouena ntšamo Jesús y chënga imojtse-natsëtsnayana, y yojtsetátšëmbo Jesús tšabá tojanëjuama. As, tojanobeconá y Jesúsbioye tbojantjá: –¿Ndayá chë más bëts uámana mando yomna ca?

²⁹ Y Jesús tbojanjuá: –Chë más uámana mando mëntšá endmëna: “Israeloquënga šmochjouena,

Utabná, Bëngbe Bëtsá endmëna, y nÿe canÿe Bëngbe Utabná endmëna, ndocná más.

³⁰ Utabná Bëngbe Bëtsá cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.”

³¹ Y chentšana quem inÿe mándnaca: “Ndëmua entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

³² Chora, chë ley abuatambayá Jesúsbioye tbojanियana: —Buatëmbayá, puerte tšabá tcjayana. Ndegombre yomncá contsichamo, nÿe canÿe Utabná endmëna y ndocná más.

³³ Y cha jtsebobonshánana nÿets ainánaca, juábnaca y añémoca, y ndëmua entšánaca jtsebobonshánana cachá cuenobobonshancá, puerte cuámana. Cach nÿetsá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

³⁴ Cha nÿets juábnaca tbojanjuama Jesús tojáninÿe ora, tbojanियana: —Batšatema cmontsebuáshbena jtseprontánama, Bëngbe Bëtsá chacolesenciama acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

¿Cristo ndabe entšábentšana yomna?

(Mt 22.41-46; Lc 20.41-44)

³⁵ Jesús Bëngbe Bëtsabe bëts yebnentše yojtsabuátambaye ora, tojánayana: “¿Ndáyeca chë ley abuátambayënga mondbétsichamo chë Uámana Uabuayaná Davídbentšana iuabó ca?

³⁶ Cach David, chë Uámana Espíritbe mándoca mëntšá tojánayana:

Bëngbe Bëtsá, atšbe Utabná Crístbioye tbonjaniana:

atšbe catšbioica mótbema,

atšbe obenánaca, acbe uayayënga acbe cucuatšíne chamoquedama chjamëntscuana ca.

³⁷ ¿Ntšámose Cristo Davídbentšana Entšá nántsemna, cach David ‘Utabná ca’ chábioye tbojtsabobuátmëse ca?’ —cha tojanëyana.

Y chë bëtsá entšanga, oyejuayënga imojtsue-nana.

Jesús chë ley abuatambayëngbiana tojánayana, chënga ndoñe tšabá montsama ca

(Mt 23.1-36; Lc 11.37-54; 20.45-47)

³⁸ Mëntšánaca Jesús chënga yojtsabuátambaye: “Cuedado šmochtsebomna y ndoñe šmattsama chë ley abuatambayëngcá. Chënga jtsogusetánana bënëna entšayangaca jtsajnana y jtsebošana tsáshenañe entšanga nÿa respétoca chamot-sacheuanama.

³⁹ Chë judiëngbe enefjuana yebnënguenache, chë más uámana luarënguiñe jtsetbiámanana, y chë fi-estënguenache nÿa quëfseroca.

⁴⁰ Pero chënga, viudángbioye chë tmobomna soyënga jtsabacayana, y entšangbe delante tšabá chamotsënÿama, y chëngbioye imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá ínÿengbiana más chënga echanjácastigaye ca” — Jesús tojánayana.

*Jesús yojtsěnyaye chě crocénana quěcjnyěnga
(Lc 21.1-4)*

⁴¹ Jesús jabuátambama tojanpochocá ora, tojanótbema Běngbe Bětsabe běts yebnentše, chě crocénana quěcjnyětema ndirichiñe; y chě crocénana quěcjnyěnga yojtsěnyaye. Bětscá bomněngna becá crocénana imojtsequěcjnyaye.

⁴² Chora, canye viudá ndbomnějémnaca yojobecóna y nye uta crocénana chětémiñe yojaftsesegóra.

⁴³ Chora Jesús chabe uatsjėndayěnga tojánachembo chamobéconama, y měntšá tojaněyana: “Ndegombre cběyana, quem viudá ndbomnějema, Běngbe Bětsabiana nyetscangbiana más tonjěftseseGORÁ.

⁴⁴ Chě bomněngna chě yojtsóyentsjamentšana tmonjěftseseGORÁ, y cabá bomnana imotsóbomñe; y chě viudana tonjěftseseGORÁ lempe ntsachetšá yobomncá; masque tša ndbomnějema, chě vida jtsebomnama lempe ntsachetšá yobomncá tonjěftseseGORÁ ca.”

13

*Jesús tojánayana chě Běngbe Bětsabe běts yebna
lempe mochjənpochocama
(Mt 24.1-2; Lc 21.5-6)*

¹ Jesús Běngbe Bětsabe běts yebnentšana tojěftsanbocna ora, canye chabe uatsjėndayá tbojaniyana: —Buatěmbayá, minye, itša běts ndětsbenga, y tša botamana běts yebněnga ca!

² Chora Jesús tbojaniyana: —Tšabá cochjinye tša botamana běts yebněnga. Pero muentše ndoñe

queochaisoquéda ni mo canye ndëtšbé inyebé juatsboye. Lempe mochantsepochóca ca.

Ntšamo yochtsemna quem luare jopochócama te chaojtsobeco ora

(Mt 24.3-28; Lc 21.7-24; 17.22-24)

³ Chentsana, Olivos tjashoye chënga tmojána. Bëngbe Bëtsabe bëts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá,

⁴ ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

⁵ Chora Jesús tojanějua: “Cuedado šmochtsebomna ndocná chacmondáingñema.

⁶ Banga mochanjabo y mochantšabíchamo chënga Jesús imomna ca. Mochántšichamo: ‘Atše chë Cristo sëndmëna ca’, y chca, ba entšanga mochanjáingñaye.

⁷ “Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátsmëna.

⁸ Canye luarentša entšanga inye luaroca entšangaftaca mochántšentsjanaye, y canye amëndayábentša entšanga inye amëndayábioca entšangaftácnaca; ba luarënguenache fshantse echanjuangmëmana y bëts shëntsana echanjóshjango. Masque chca jasúfriase, más chcoye cabá más mochanjatssúfria.

9 “Pero tšëngaftangna cach tšëngaftangbiana šmochtsantješna; entšanga cmochanjíshêche y amëndayëngbe cucuatšiñe cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bétsemna causa, mandadëngbioye y reyëngbioye cmochanjunatse, choca, chëngbe delante ntšamo atšbiana šmotatšëmbcá chašmuayanama.

10 Er entseyta, quem luare cabá ndopochóca ora, Bëngbe Bëtsabe tšabe noticiënga nyetsca lu-arënguentša entšángbioye chaóshjanguama.

11 Y ínÿengbe cucuatšiñe jabáshejuanama chacmojtšënachá ora, ndoñe šmattsenócochinÿena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánÿenga ndoñe chora quešmochátoyebuambnaye, ndayá chë Uámana Espíritu tšëngaftangbiajana echantsóyebuambnaye.

12 “Canÿe catšata cachabe catšata ínÿengbe cucuatšiñe bochanjáboshjona chamotsóbama, y bëtšëtsanga cachëngbe básenga mochanjábáshejuana chamotsëbáyama; y chë básengna chëngbe bëtšëtsangbe contra mochántsemna y chamotsëbáyama mochanjábáshejuana.

13 Atšbe ústonënga bétsemna causa, nyetsca lu-arënguentša entšanga cmochantsëbuayënja; pero nda nyets tempo átšbeñe ošbuachiyá totsomñe, atsbocaná echántsemna.

14 “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócamá tojëftsanabema. Chë

puerte uabouana soye, chca jtsemnama ínÿoca tšëngaftanga chašmojinÿe ora (nda tojtsalía, chabosertá), šmochántsetatsšëmbo chë puerte ngménana tempo tojóshjanguama; chorna, chë Judeoca chamojtsemna entšanga, batsjabengoye chamotsacheta;

¹⁵ chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama;

¹⁶ y nda jajoca chaojtsemna, yebnoye ndoñe chaondéta ni mo chabe quëfsaíya jesácñama.

¹⁷ ¡Tša lastema chë tempo ngomámanënga o ochóchaye šešonga chamojtsabamna shembásengbiama!

¹⁸ Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora,

¹⁹ er chora puerte ngmenancá echántsemna. Tša jabuache ngmenancá, quem luare jobojátšama orscana y mëntscoñama y más chcoye, cachcá ngménana ndoñe ntjamnana.

²⁰ Chë puerte ngménana tempo, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe chaondétsemnama.

²¹ “Chora nderado nda chacmojáuyana: ‘Minÿe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana.

²² Er mochanjábocana ndoñe ndegombre

uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca.

²³ ¡Cuedado šmochtsebomna! Cabá chca ndochnëngo ora, lempe tcbonjabuayená ca” — Jesús tojanéyana.

Bëngbe Bëtsá Entšá tbojanbemá quem luaroye echanjésabo

(Mt 24.29-44; Lc 21.25-36)

²⁴ Mëntšánaca Jesús tojanéyana: “Pero chë tempo, entšanga puerte chamojasufrí chentšana, shinÿe ndoñe queochátsbuashinÿinÿana, juashcona ndoñe queochátsbinÿnaye,

²⁵ celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmana.

²⁶ Y chora, entšanga mochanjinÿe, Bëngbe Bëtsá Entšá tbojanbemá jantšetëshiñe echántsaboye, corente obenánaca y corente buashinÿinÿaniñe.

²⁷ Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nÿets luarëngocana, quem fshantsoca cánÿoica juachoicana, celoca ínÿoica juachóntscoñe.

²⁸ “Chë higo betiyama šmochjuatsjinÿe: Tsëm buacuañjënga tojtsebomna ora y tojtsaisëjotsana, jtsotatsëmbuana chë tšabe tempo ya tojtsaisobe-cuama.

²⁹ Cachcá, chë soyënga ndayama tšëngaftanga tcbonjauyancá chašmojinÿe

ora, šmochántsetatsëmbo Bëngbe Bëtsá Entśá tbojanbemá ya jésabama yojtsemnama.

³⁰ Ndegombre cbëyana, lempe chca echanjochnëngo, morsca entśanga cabá ndóbana ora.

³¹ Celoca y quem luare echanjopochóca, pero atśbe palabra ndocna te queochaisopochóca.

³² “Pero Bëngbe Bëtsá Entśá tbojanbemá ndayté y ntseco ora yochjésabama, ndocná quenátstatśëmbo, ni chë celoca angelënga, ni Bëngbe Bëtsabe Uaquiñá. Nye chë Taitá chama yotátśëmbo.

³³ “Chíyeca, cuedado šmochtsebomna y yejuana šmochtsantješna, er ndoñe quešmátstatśëmbo mocna ora yochtsemna Bëngbe Bëtsá Entśá tbojanbemá jésabama tempo.

³⁴ Echántsemna mo canye entśacá; chana inye luaroye ya jëftsebocnama ora, chabe oservénënga jëftsamëndana chabe yebna chamotsinýenama. Cada ona canye trabajo jëftsebóniyana, y chë shanyá jëftsemándana botamana chaotsantješnama.

³⁵ Chcasna, cuedado šmochtsebomna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatsëmbuana, mo nderado jétatana, tsëntseto ora, bínyanoye o cachëse, tšëngaftanga cachcá, Bëngbe Bëtsá Entśá tbojanbemá ntseco jésabama ndoñe quešmátstatśëmbo;

³⁶ ndoñe cuedado šmontsebomnëse, nderado cha nye ndeolpe nántashjango, tšëngaftanga ndëprontánënga šmojtsemna ora, mo ftsomañe cuenta.

37 Chíyeca, ntšamo tšëngaftanga cbochan-jauyancá, nyetscanga chanjáuyana: ¡Puerte cuedado šmochtsebomna ca!” —Jesús tojánayana.

14

Entšanga imojtsejuabnaye ntšamo jamëse Jesús jishachama

(Mt 26.1-5; Lc 22.1-2; Jn 11.45-53)

¹ Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama.

² Báseftanga imojtsichamo: “Quem fiestëntscuana ndoñe, er nderado entšanga yapa muanjóntša en-bouenanana ca.”

Canÿe shembása botamana uanguëtse béjaye Jesusbe bestšašiñe tbojanbuešcja

(Mt 26.6-13; Jn 12.1-8)

³ Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canÿe shembása tojánashjango. Chë shembása yojúshjango canÿe alabastro jarrëtema jútjena canÿe becá uámana y botamana uanguëtse béjayeca, ena nardana uanguëtšiye; chana chë jarrëtema yojátsba y chë béjaye Jesusbe bestšašiñe tbojanbuešcja.

4 Chca tmojáninÿe ora, báseftanga chentše imojtsemnënga tmojanotjayaná y mëntśá imojtsenatsëtsnaye: —¿Ndáyeca nÿe bonamente chë soye yojtsemna ca?

5 Chamna, matmënjobenanga chë béjaye unga patse denario crocenánama juiyana, y chánaca ndbomnëjëmënga matmënjújabuache ca.

Y chë shembásabiama podesca imojtsichamo.

6 Chora Jesús tojanéyana: —¿Ndáyeca quem shembása ndoñe cachcá šmochanjonÿaye ca? ¡Ndocá matatsana! Atšbiama tšabe soye tonjama.

7 Er ndbomnëjëmënga nÿets tempo tšëngaftangbeñe mochanjëftsemna, ndayténaca šmojábošena ora, šmatjobenaye tšabe soye chëngbiama jamana; er atše tšëngaftangaftaca ndoñe nÿets tempo quicháisemna.

8 Quem shembása lempe ntšamo tojobenacá atšbiama tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná séntsemna ora.

9 Ndegombre cbéyana, quem luaroca ndayéntśnaca Bëngbe Bëtsabe tšabe noticiënga chamojtsabuayiyná chentše, ntšamo quem shembása tojamámnaca becá mochanjëftsóyebuambaye, chca, entšanga chabiama chamotsenójuabnama ca —cha tojanéyana.

Judas tojána bachnangbe amëndayëngbioye, Jesús chamuishachama

(Mt 26.14-16; Lc 22.3-6)

10 Chentšana, Judas Iscariote, canÿe chë bnëtsana uta uatsjendayënguentśá, tojána chë

bachnangbe amëndayëngaftaca jencuéntama, Jesús chëngbe cucuatšiñe jaboshjonama.

¹¹ Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšiñe jaboshjonana.

Jesús chabe uatsjëndayëngaftaca Bashco saná tojanse

(Mt 26.17-29; Lc 22.7-23; Jn 13.21-30; 1 Co 11.23-26)

¹² Chë Bashco fiesta bojatsenté, chë levadúraca ndëpormana tandëše sayté, chë uatsjëndayënga Jesús tmojantjá: —¿Ndémoca cojtseboše bënga fchaiprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canÿe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

¹³ As Jesús uta chabe uatsjëndayata tojanichamó y mëntšá tojanëyana: —Chë bëts puebloye motsata. Chašojáshjango ora, canÿe bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndëmuanÿe yebnentše yochjámarshënguama;

¹⁴ y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?”

15 As cha cmochanjínÿanÿiye canÿe bëts tsañe, tsbanana pisoca, lempe prontániñe; chentše šochjaprónta bënga mochjasama ca.

16 As chë uatsjéndayata tbojána y tbojáninÿena lempe ntšamo Jesús tojanëyancá; y chentše chë Bashco saná tbojanprontata.

17 Tojanibétata ora, Jesús chë yebnoca tojánashjango, chabe bnëtsana uta uatsjéndayëngaftaca.

18 Y mesëshentše imojtsesaye ora, Jesús tojanëyana: —Ndegombre cbëyana, canÿa tšëngaftanguentsá, átšeftaca entsesá cha, uayayënge cucuatšíñe šochanjáboshjona ca.

19 Chorna chë uatsjéndayënga ngménaca imojtsemna, y tmojanontšé canÿánÿa cha jatjayana: — ¿Atše chtsemna ca?

20 Y Jesús tojanëjua: —Canÿa chë bnëtsana uťatentsá entsemna. Chabe tandëše cach atše sëntsefchecuacná šcnenentše cha entsefchecuacná.

21 Ndegombre, Bëngbe Bëtsá Entšá tbojanbemáftaca echanjopása ntšamo chabiamana Bëngbe Bëtsabe uabemana palabrënguiñe endayancá. Pero, itša lastema chë bochjáboshjonabiamana! Chabiamana más tšabá manjamna ndoñe ntjónÿnana ca —Jesús tojánayana.

22 Imojtsesantscuana, tandëše tojanca, Bëngbe Bëtsábioye chama tbojtanchuá, tojanjataye y chabe uatsjéndayënga tojanëjatá, y mëntsá tojánayana: “Mocñënga, mosënga, atšbe cuerpo entsemna ca.”

23 Chentšana, canÿe coptema vínoyeca tojanaca, Bëngbe Bëtsábioye tbojtanchuá,

chabe uatsjéndayënga tojanëfsašé, y nyetscanga tmojanofsé.

²⁴ Mëntsá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojašebuachenacá ndegombre yochjochnënguama. Chë buiñe bëtská entšangbe tšabiamana echanjuábuashana.

²⁵ Y ndegombre cbëyana, morscana ya ndoñe más chë uvasësentšana obocniye quichaisofšiye. Chë tsëm vínoye tšëngaftangaftaca chanjofšiye, Bëngbe Bëtsabe amëndayoca chamojtsemna ora ca” –tojánayana.

Jesús tojánayana, chábioye ndoñe bonjanabuátma ca Pedro yochjánayanama
(Mt 26.30-35; Lc 22.31-34; Jn 13.36-38)

²⁶ Bëngbe Bëtsábioye jëtschuayama tmojancantá chentšana, Olivos tjashoye tmojëftsanbocana.

²⁷ Jesús tojanëyana: —Nyetsca tšëngaftanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrënguiñe, cha mëntsá tojánayana: “Chë oveshënga abujënÿa chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora.

²⁸ Pero obanënguentšana chaitayenentšana, tšëngaftangbe natsana Galileoye chanjá ca —cha tojanëyana.

²⁹ Chora Pedro tbojanianana: —Masque nyetscanga ábeñe ošbuáchiyana chamotsobuetše y chamotsacheta, atše nÿa ndocna te ca.

30 Chora Jesús tbojanियana: —Ndegombre cbëyana, cam ibeta, ngallo cabá uta soye ndëcánta ora, aca unga soye cochanjayana ndoñe šconduabuatma ca.

31 Pero Pedro más yojsichamo: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyetscanga cachcá imojtsichamo.

Getsemaní luarentše Jesús, Bëngbe Bëtsáftaca tbojanencuentá

(Mt 26.36-46; Lc 22.39-46)

32 Chentšana, canye luare Getsemaní ca uabáinoye tmojána. Chocna Jesús tojanéyana: “Muentše motbiana, chëntscuana atše choye chanjá, Bëngbe Bëtsáftaca jencuéntama ca.”

33 Y tojëftsanëbiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná.

34 Chëngbioye tojanéyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

35 Chentšana, Jesús más natsanoye tojána, tojanoshëntsamentšé y fshantsóntscoca tojanotsejbéna y Bëngbe Bëtsábioye tbojanimpadá, jopódianëse, chë tša japadésa ora ndoñe chaondóshjanguama.

36 Mëntšá yojsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

37 Chentšana, chabe unga uatsjëndayëngbioye tojtanabo, y chëngna imnétsomañe. Chca tojánanyëna

ora, Pédrëbioye tbojanियana: “Simón, ¿cotsomañe? ¿Ni mo nÿe canÿe hora jtsefsnama ndoñe tconjobená?”

³⁸ Smochtsefsna y Bëngbe Bëtsáftaca šmochtsencuéntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

³⁹ Jesús cachiñe tojesaná y Bëngbe Bëtsáftaca tbojanencuentá, cach palabrënga jayanëse.

⁴⁰ Yojtabo orna, chë uatsjëndayënga cachiñe imnétsomañe; chënga imojtsefshétana ocñaye causa, y ndoñe imontsobena ntšamo jojuana.

⁴¹ Chentšana, tojtesaná y tojtanabo ora tojanëyana: “¿Cabá šmotsomañe y šmotsochñañe? Nÿe nÿetsá; hora tocjobuache, Bëngbe Bëtsá Entšá tbojanbemá bacna soye amëngbe cucuatšíñe mochanjáboshjona.

⁴² Motsbananga, cuajna. Minÿënga, atše boshjuaná ya entsebeconá ca.”

*Uayayënga Jesús tmojánishache
(Mt 26.47-56; Lc 22.47-53; Jn 18.2-11)*

⁴³ Jesús cabá yojtsóyebuambnantscuana, Judas, canÿe chë bnëtsana uta uatsjëndayënguentsá, tojánashjango y cháftaca ba entšanga espadëjangaca y ngarotbéngaca prontánënga. Chënga imojamna chë bachnangbe amëndayënga, ley abuátambayënga y judiëngbeñe bëtsëjemëngcá mándayëngbe ichmónënga.

⁴⁴ Judas, chë boshjuaná, tojanjuabó ntšamo jamana entšanga jinÿanÿiyama ndëmua Jesús bétsemnana. Chíyeca, yojáuyana: “Nda

chajjauámocho, cha echántsemna; šmochjishache y cuedádoca šmochjuánatse ca.”

⁴⁵ Chcasna, Judas Jesúsbioye tojanobeconá y tbojaniana: “¡Buatëmbayá ca!”

Y tbojanámocho.

⁴⁶ Chora chë entsanga tmojánishache y tmojanánatse.

⁴⁷ Pero canya chentše Jesúseftaca yojtsemná, chabe espadëja yojenosëngbotëntšena, y chë bachnangbe más uámana amëndayabe oservená canye matscuaše tbojtsanéstjango.

⁴⁸ Y Jesús chë entsanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canye bacá uamana entšá cuaftsemncá ca?”

⁴⁹ Atše cada te tšëngaftangbeñe sëndétsemna Bëngbe Bëtsabe bëts yebnocá abuatambaye, y ndocna te choca chešmátanishache. Pero tšëngaftanga chca átšeftaca šmontsama, cachcá ntšamo Bëngbe Bëtsabe uabemana palabrënguiñe endayancá chaotsemnama ca” –tojánayana.

⁵⁰ Chorna, nyetsca uatsjëndayënga tmojt-sanëuatjaná y tmojtsanacheta, y Jesús cachcá chë uayayëngaftaca tmojesanonýá.

⁵¹ Canye bobontse Jesúsbioye ibojtsëstona, nye canye uafjantse entšëjua uichëtjoná. Cha chë entsanga tmojánishache,

⁵² pero chëngbe cucuatšiñe chë entšëjua jesáboshjonëse, chë bobontsna enašá yojtsachá.

Jesús tmojanánatse chë judiëngbe uámana

amëndayëngbioye

(Mt 26.57-68; Lc 22.54-55, 63-71; Jn 18.12-14, 19-24)

⁵³ Chentšana, Jesús tmojanánatse chë bachnangbe más uámana amëndayábioye; y chocna, nÿetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna.

⁵⁴ Pedro bënocana Jesús tbojanasto, chë bachnangbe más uámana amëndayabe yebnentša chashjóntscoñe; y chentše tojanoquedá. Chë Bëngbe Bëtsabe bëts yebnocá josticiëngaftaca yojtsetbemana; iñe juachaca yojtsešbonena.

⁵⁵ Chë bachnangbe amëndayënga y chë judiëngbe uámana mándayënga imojtsenguaye canÿa, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninÿana.

⁵⁶ Er masque banga Jesusbe contra uayátsenaye soyënga imojtsichamo, nÿetscanga ndoñe cachca soye montsanichamo.

⁵⁷ Báseftanga imojotsaye y mëntšá Jesusbe contra, ndoñe ndegombre betsemncá tmojánayana:

⁵⁸ “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entsangbe pormana yebna, chantsepochoça; y unga tese inÿe Bëngbe Bëtsabe bëts yebna, entsángbeyeca ndëpormana yebna chanjëtšjebo ca.’ ”

⁵⁹ Pero masque chca imojtsichamo, nÿetscanga ndoñe cachca soye montsanichamo.

⁶⁰ Chorna, chë bachnangbe más uámana amëndayá yojotsbaná, nÿetscangbe tsëntsaca

yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶¹ Pero cha nÿe iytëca yojtsemna y ndocá ibontsëjuana. Chë bachnangbe más uámána amëndayá cachiñe tbojtëtantjá, mëntšá: — ¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

⁶² Y Jesús tbojanjuá: —Arseñor, atse cha sëndmëna; y tsëngaftanga šmochanjinye, atse, Bëngbe Bëtsá Entšá tbojanbemá, chë nÿets obenana bomnabe catsbioica chantsetbemana, y celoca jantšetëshiñe chántsaboye ca.

⁶³ Chora, chë bachnangbe más uámána amëndayá chabe uichëtjonëjuangá yojt-senántšajatanëca, puerte ibojtsetna causa, y tojánayana: —¿Ndayama más entšanga šochjátëjaboto Jesusbe contra chamuayanama ca?

⁶⁴ Tsëngaftanga šmonjouena ntšamo chë entšá entsichamcá, y chca Bëngbe Bëtsabiamana entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanëyana.

Y nÿetscanga tmojánayana, cha ndegombre bacna soye yojtsebmna y jóbanama ibojtsemna ca.

⁶⁵ Chorna báseftanga tmojanontsé Jesús buashëtjnyana; jubiá imojútsbotse, imojtse-jantšetaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebiantšetaye.

Pedro tojánayana Jesúsbioye ndoñe bonjanabuátma ca

(Mt 26.69-75; Lc 22.56-62; Jn 18.15-18, 25-29)

⁶⁶ Pédrëna, tsmanoca yojtsemna chashjoca. Chora, canye shembása, chë bachnangbe más uámána amëndayabe oservená yojáshjango;

⁶⁷ y Pédrëbioye tbojáninye ora, cha iñe juachaca yojtsansbonena, yejuana ibojonýinye y tbojaniana: —Acnaca, Jesús Nazaretocáftaca conjánana ca.

⁶⁸ Pero Pedro tojánayana chábioye ndoñe bonjanabuátma ca; y mëntśá tojánayana: —Ndayama cojtsichámuama ndoñe quetsátstatsëmbo, ni queśnátësertana ca.

Y shjoye, amashjuanóntscoñe yojábocna; y chora canye ngallo yojacánta.

⁶⁹ Chë oservená cachiñe Pédrëbioye tbojáninye y tojanontsé chë ínÿenga jauyanana: —Muánaca Jesusbe uatsjendayënguentsá entsemna ca.

⁷⁰ Pero chana cachiñe tojánayana Jesúsbioye ndoñe bonjanabuátma ca. Chentsana, chë chentşe imojtsemnënga Pedro tmojátaniyana: —Ndegombre aca chënguentsá contsemna; ácnaca Galileocá contsemna ca.

⁷¹ Pero Pedro tojanontsé ichámuana: —¡Bëngbe Bëtsá chaşotsecastigá ndoñe ndegombre soye stsichámëse ca! —y yojóntśa júrayana — ¡Atşe chë entsá ndoñe quetsatabuatma, ndabiamatşëngaftanga şmontsatsëtsná ca!

⁷² Y cachora chë ngallo uta soyama yojacánta, y Pedro yojenójuaboye ntşamo Jesús tbojanianama: “Ngallo cabá uta soye ndëcánta ora, aca unga soye

cochanjayana ndoñe šconduabuatma ca.” Y tojanontsé enóbošachiyana.

15

Jesús Pilátbioye tmojanánatse

(Mt 27.1-2, 11-14; Lc 23.1-5; Jn 18.28-38)

¹ Tojanbinýna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuátambayënga cánýentse tmojánenefjna, nýetsca chë luarentša más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatsëca y tmojanánatse, y Pilato, chë Judeoca mandadbe cucuatšinë tmojánboshjona.

² Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

³ Chë bachnangbe amëndayënga bëtscá soyënga Jesusbe contra imojtsichamo;

⁴ chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minýe; bëtscá soyënga acbe contra montsichamo ca.

⁵ Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mt 27.15-31; Lc 23.13-25; Jn 18.38-19.16)

⁶ Cada Bashco fiesta ora, Pilato yojanamana canýe utamená jëtsboshjonana, ndánaca entsanga tmojuabuayaná.

⁷ Chë tempo yojamna canýa Barrabás ca uabainá; cárceloye inautámena chabe

enutëngaftaca. Chëngna entsànga tmojtsanëbaye, mandadëngbe entsàngaftaca imojentsjaná ora.

⁸ Chora, entsànga tmojánashajna y tmojanontsé Pilátbioye jauyanana, ntšamo Bashco fiesta ora jamama yojanamancá chaomama.

⁹ Y Pilato tojanējua: —¿Tšëngaftanga šmojtseboše tšëngaftangbe rey atše chjëtsboshjona ca?

¹⁰ Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšinë tmojánboshjona.

¹¹ Pero chë bachnangbe amëndayëngna entsànga tmojanañemó chamuenbouéнанama, Pilato jauyanama chëngbiana Barrabás chabuatsboshjona ca.

¹² Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

¹³ Y chënga tmojanáyebuachena: —¡Motsecrucificá ca!

¹⁴ Y Pilato entsànga tojanéyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtëtanayebuachena: —¡Motsecrucificá ca!

¹⁵ As Pilato, entsàngaftaca tšabá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšinë tbojánboshjona, chamocrucificama.

¹⁶ Chentšana, chë soldadënga Jesús tmojanánatse chë mandadbe bëts yebnentša chashjoye, y nÿetsca soldadënga tmojánachembo chamobéconama.

17 Shbuenda uafjatsenga uinÿna entšayá mo reycá tmojanichëtjo; canÿe coronëshu tmojanapormá uchmašëfjangaca y tmojanabestšajó.

18 Y chentšana tmojanontšé jachuayana: “¡Bayté judiëngbe Rey cochtsemna ca!”

19 Canÿe niñëfjaca Jesús bestšašinë imojtsëtsjanjnaye, imojtsebuashëtjnaye, y chabe delante imojtsofshëntsamëntšenaye.

20 Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

Jesús tmojancrucificá

(Mt 27.32-44; Lc 23.26-43; Jn 19.17-27)

21 Chora, canÿe entšá chëjana yojtsatashajuana, Simón ca uabainá, Cirene pueblócá, Alejandro y Rufbe taitá; jajocana yojtsatachnëjuana; y chë soldadëngna imojuatária Jesusbe cruz jëftsocutsayama.

22 Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”);

23 y tmojanabuiyé vínoye mírraca enájuabniye, pero Jesús ndoñe yonjuáyëngacñe.

24 Y chentšana tmojancrucificá; y chabe entšayangamna, tsbanánoye tmojanëtšena jinÿama ndayá cada ona yochjëtsanácñama.

25 Cachëse, base mošenana ora Jesús tmojancrucificá.

26 Y chabe bestšaše juatsboicna canÿe uabemana soye tmojananjo. Chiñe yojëtsayana ndáyeca cha tmojancrucificama, mëntšá: MUA CHË JUDIËNGBE REY ENDMËNA ca.

27 Y cháftaca útata bacna soye ochjajnayátnaca tmojanacrucificá, canya chabe catsbioica, y ínñana chabe uañicuayoica.

28 Chca cháftaca tmojanma, chaochnënguama ntšamo Bëngbe Bëtsabe uabemana palabrënguine chabiamá iuayancá, mëntsá: “Y chábioye tmonjáninye mo chë puerte bacna soye amënguentšá canya cuaftsemncá ca.”

29 Y chëjana imojtsachnëjuana entsanga, Jesús imojtsóyenguaye, imojtsobestšfshanenaye y imojtsatsaye: “¡Aca chë Bëngbe Bëtsabe bëts yebna cochtsánenasatajchca y nye unga tese cochtanjebo,

30 cach aca mentsbocá y cruzocana matastjango ca!”

31 Cachcá chë bachnangbe amëndayënga y chë ley abuatambayënga imojtsáboyejuana, y chënga imojtsenatsësnaye: “Cha ínýenga tojëftsatsebacá, pero cachá jéntsbecama ndoñe quenátobena.

32 ¡Chë Cristo, chë Israeloca Rey! ¡Cruzocana chauatastjango, bënga jinýama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

Jesús tojanóbana

(Mt 27.45-56; Lc 23.44-49; Jn 19.28-30)

33 Nýetsto orscana y las tresëntscoñe, nýets quem luare yojtseibétata.

34 Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýá ca?”)

35 Chca tmojanuena ora, báseftanga chentše imojtsemnënga imojtsichamo: “Mouenënga, chë Bëngbe Bëtsabe juabna oyebuambnayá Elías bontsechembuana ca.”

36 As chora, canya tojanótjajo, untja vínoyeca canye esponjëshe tojanfchecuacúa, canye niñëfjiñe tojananguësëtjo y Jesúsbioye tojanbeconá chaofšema; y tojánayana: “Cachcá mochjonýaye, er Elías tayochjabo jabátëstjanguama ca.”

37 Pero Jesusna, jabuache tojanoyó y tojanóbana.

38 Y chë Bëngbe Bëtsabe bëts yebnoca yojújonýana entšëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaújonýana.

39 Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boy-abása Bëngbe Bëtsabe Uaquiñá yomna ca!”

40 Básefta shembásengnaca chentše imojtsemna, bënocana imojtserreparana; chënguentše imojtsemna María Magdalena; María, Santiago chë más basa y Josebe mamá; y Salomé.

41 Chë shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojtsemna, chë cháftaca Jerusalenoye tmojánanga.

Jesús tmojanatbontsá

(Mt 27.57-61; Lc 23.50-56; Jn 19.38-42)

42 Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora,

⁴³ Pilato yojtsemnoye tojána canye boyabása, José ca uabainá, Arimatea pueblóca; cha inamna canye chë luarentša uámana mandayënguentšá. Cha Bëngbe Bëtsábeñe yojtsošbuáchiye y yojanobátmana chabe amëndayana chaóshjanguama. Ndauatjá Pilátbioye Jesusbe cuerpo tojanotjañe.

⁴⁴ Pilato yojenjnaná Jesús tša betscó yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojëtsemnama.

⁴⁵ Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tojanlesenciá Jesusbe cuerpo chabotsámabañama.

⁴⁶ Chora, José canye uafjantse lino entsšëjua tojanabuamé, Jesusbe cuerpo cruzocana tojanëstjango, chë lino entsšëjuaca tojanandmaná, y canye cuevëshiñe ndëtsbeñe pormánëshiñe tojanjajó; chentšana canye ndëtsbé tojansjoná, y chë cuevëshoye amashjuanentše tojánachto.

⁴⁷ María Magdalena y María, chë José y Santiagbe mamá, tojáninye ndayentše Jesusbe cuerpo tojanjájoma.

16

Jesús tojtana yena

(Mt 28.1-10; Lc 24.1-12; Jn 20.1-10)

¹ Ochnayté tojanopasá ora, María Magdalena, María Santiagbe mamá, y Salomé, botamana uanguëtše béjaye tmojanabuamé, chíyeca jama Jesusbe cuerpo janëtjuama;

² y tmenguse, chë semana bojatšéntena, cabá cachëse, shinÿe yojábocna ora, chë cuevëshoye tmojána.

³ Imojtsaye ora imojtsayénatsëtsnaye: “¿Chë cuevëshoye amashjuanentša ndëtšbé nda bochtsabuajuána ca?”

⁴ Pero imojontješiyeye ora, tmojáninÿe chë cuevëshoye amashjuanentša bëtš ndëtšbé, chentšana juanániñe.

⁵ As chënga choye tmojánamashjna y choye tmojáninÿe canÿe bobontse bën uafjantse entšëjua uichëtjoná, chë cuevëshentša catšbioica inétsotbemañe; y chë shembásenga imojouatjaná.

⁶ Pero chë bobontse tojanëyana: “Ndoñe matau-atjëngana; tšëngaftanga šmondënguá Jesús Nazaretocá, chë tmonjancrucificá cha. Cha ya ton-tayena; muentše ndoñe quenátsmëna. Minÿënga cha enjëftsejajonentše.

⁷ Motsajna, y Pedro y chë inÿe uatsjëndayënga šmochjáuyana: ‘Jesús tšëngaftangbe natsana Galileoye echanjá. Choca cha šmochanjinÿe, ntšamo cachá tmojanëyancá ca.’ ”

⁸ As chë shembásenga betesco chë cuevëshentšana tmojésanbocana, er puerte auatjanánënga imojtsemna y ngmëmnayënga imojtsemna; y chë causa, chë soyama ndocná tmonjanianyana.

*Jesús, María Magdalénbioye tbojánebëbocna
(Jn 20.11-18)*

⁹ Jesús tojtanayenentšana, chë semana bojatšenté, Jesús natsana María Magdalénbioye tbojánebëbocna. Tempo Jesús chábentšana canÿsëfta bacna bayëjënga tojtanëbuacana.

¹⁰ Cha Jesúsbioye ainá tbojáninÿentšana, tojána Jesúsfeftaca imojánajnënga chama jaúnayama; chëngna ngménaca y šachénaca imojtsemna.

¹¹ Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninÿe ca tmojanuena ora.

*Uta ustonata Jesúsbioye tbojáninÿe
(Lc 24.13-35)*

¹² Chentšana, uta ustonátbioye, básefta yebnënga yojamna luaroye ibojétsaye ora, Jesús tojánëbëbuacna, mo inÿa cuaftsemncá.

¹³ Chora chata tbojésanshëcona chë inÿenga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjéndayënga tojanichamó, Bëngbe
Bëtsabe soyëngama nÿetsquénache jábuayenama
(Mt 28.16-20; Lc 24.36-49; Jn 20.19-23)*

¹⁴ Cabana, Jesús chë bnëtsana canÿe uatsjéndayënga tojánëbëbuacna, chënga imojtsetsaye ora; y tojanëcácana chë cha ainá yojtsemnama ndoñe ndegombre yontsemna ca tmojánjuaboma y nÿets ainánaca chábeñe ndoñe montsanošbuachema, er cha ainá tmojáninÿënga chama tmojanacuntá ora, chca ndoñe ndegombre yontsemna ca chë uatsjéndayënga tmojánayana.

¹⁵ Chentšana Jesús tojanëyana: “Nÿets luarëngoye motsajna, y nÿetsca entšanga chë tšabe noticiëngama šmochtsabuayiynaye.

¹⁶ Nda chiñe chaojtsošbuaché y tšëngaftanga chašmojuabaye, cha atsbočaná echántsemna; pero

nda ndoñe tontsošbuaché, cha nyets tempo castiganá echántsemna.

17 Chë átšbeñe ošbuáchiyënga ndegombre soyënga imojtsabuayiynama, entšanga mëntšá mochántsetatsëmbo: atše jótšëmbonëse, átšbeñe betsošbuachéyeca, entšángbentsšana bacna bayëjëngbe juabna mochántábocna; tempo chënga ndmabiyañe mochantsóyebuambnaye.

18 Masque nderado cucuatšinë mëtšcuayënga tmojishache o veneno tmojofšenga, ndocá quemochatspása; y šoquëngbeñe cucuatšënga chamojacjá ora, chënga shnánënga mochántatsmëna ca” —Jesús tojanëyana.

Jesús Bëngbe Bëtsábioye tojtaná

(Lc 24.50-53)

19 Bëngbe Utabná Jesús jóyebuambayama tojanpochocá chentšana, celoye cha tmojtanatsbaná, y uámana luarentše, Bëngbe Bëtsabe catšbioica yojtóbema jtsemándayama.

20 Y chë uatsjédayëngna tmojánbocana y Bëngbe Bëtsabe soyëngama nyetsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatsëmbuama chë buayenana soye ndegombre Bëngbe Bëtsabe soyënga bëtsemnama, chë uatsjédayënga bëtš soyënga jamama obenana chamotsebomnama cha jtsamëse.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9